

卷

卷廿八

之

对



續文獻通考卷之二十八

征權考 雜征上

酒課

宋

寧宗嘉泰四年蠲臨安府逋酒錢六萬緡 嘉定四年

申禁兩浙福建州縣科折鹽酒 知潭州真德秀奏復

潭州酒稅狀曰權酒一事重爲潭人之害積弊已極不

容不更舊法具存不容不復竊惟酒之有權其來尚矣

然可行於江浙諸路而不可行於廣南福建者蓋瘴鄉

炎嶠疾癘易乘非酒不可以禦嵐霧而民貧俗獷其勢不能使之必沽於官故特弛其禁以從民俗之所便若荆湖以南雖非閩廣之比然其密鄰桂筦旁接連賀風土氣候往往相似故今全永郴道等州或聽民自釀而輸稅於官或於夏秋正賦併輸酒息未有專行禁權如江浙諸路者也獨潭州在城或稅或權前後屢變考諸故牘稅酒之法實起於紹興元年是時兵革未息城市蕭條幕府適有練達之人建議於州募醞戶造酒城外而募泊戶賣之城中入城之時數罌以稅官無尺薪斗

米之費而坐獲利入民無逮捕抑配之擾而得飲醇羨其後名公鉅卿相繼典州皆因而不改旁郡如衡依倣其法亦迄今遵行至乾道二年劉珙討平郴寇增置親兵又乞屯軍郴桂一時調度百出亦不敢輕變稅法但增置糯米場添劍南北楚三湘量從官賣稍分醞戶之利而已及辛棄疾之來初置飛虎一軍欲自行贍養多方理財取辦酒課乃始獻議於朝悉從官賣明年權給事中芮燁奏言潭州自行稅酒法人甚安之官不費一錢而日有所入今變稅爲權皆謂不使人多移徙墟市

一空始行之初所得雖多今止及半而米麴之本官吏  
之給盡在其中夫以小利易大不便猶不可况初無可  
得之利且彼方新經陳峒猖獗之後又可據擾之乎孝  
宗皇帝亟從其說降旨住罷令本州照久例施行及開  
禧二年趙善恭又欲盡籠其息不待奏聞遽行官權醞  
戶失業犯法者多甫及數年其弊遂極曹彥約到任時  
官賣之額日朘月減幕府相視束手無策彥約之議大  
槩以爲若行權酒則利在官吏而百姓蒙其害一爲稅  
酒則利在百姓而官吏有所不便此議一起每指以爲

難行皆官吏自爲之計非爲公家計爲百姓計者也以  
嘉定三年官賣本息計之雖名收二十萬八千五百八  
十七貫有奇而米麴柴水本錢與官吏食錢却計一十  
二萬二千三百八十二貫除本收息僅有八萬六千二  
百五貫是一日所得止二百五十餘貫若官賣一分稅  
酒二分則日稅之額不過一百六十餘貫當不難辦於  
是復行淳熙八年已降之 旨參用淳熙十年官私俱  
醞之議許城外百姓自行造酒搬運入城上秤收稅每  
酒一斤稅錢七文不稅而入謂之私酒旣而安丙來自

西蜀視事之初卽議改權且限三日打併投醪江流見者撫膺椎髀破缶在在嗟怨括馬供磨騷及編氓伐木爲薪至空嶽麓而不之恤也娼優當壚嘈雜郡齋糟糠豢豕充斥後圃凡酒家一孔之利鈎扶靡遺酒貴米賤旣相遼絕重法以禁亦不爲止搜邏之卒旁午達道連坐之人填溢犴圜富者至家籍沒貧者令衆監償異服荷校纍纍於市中下之家閱月踰時不知酒味小有讐嫌動相誣訐人人重足屏迹糯米收糶責之州縣雖窮荒之邑艱歉之歲坐數拋下無得免者監勒牙僧科索

舟船所至騷然人不堪命其害不止一州且及一路由是觀之稅之與權孰便孰否其大畧可覩矣自曹彥約復行稅法銜涇繼之每歲所入淨息率不下八萬餘貫視昔之權無大相過是不科糶不抑配不搜捕薪水之費官吏之給皆十去其七而確然一定之息踵門自至顧何所憚而不爲哉本司每歲諸軍供給賞犒之費誠爲不貲若以一歲所入截長補短痛加節約亦可僅自給外此而求多焉必曰不權不可然盈虛相較其實無幾徒爲國家歛怨一道况淳熙八年指揮初無所改謹

議日下措置復行稅酒舊法所慮人微望輕不足鎮壓  
異議既行之後他時或有變更則爲醞戶者重罹蕩析  
之禍是臣實誤之也望聖慈仰體孝宗皇帝嘉惠湘民  
之至意特降睿旨從臣所請臣當琢石鐫刻立之通衢  
以爲本州一定不易之制俾潭之百姓歌咏聖恩永永  
無極臣不勝大願

理宗紹定中楊瑾攝華亭弛酒稅 淳祐三年以嚴州太  
守李彌高趙汶侵取酒息奪官二秩

遼

遼制有頭下軍州者官位九品之下及井邑商賈之家征  
稅各歸頭下惟酒稅課納上京鹽鐵司

聖宗太平中初東遼之地自神冊來附未有權酷鹽麴之  
法馮延休韓紹勳相繼商利欲與燕地平山例加繩約  
其民病之延琳因以作亂詔復其租民始安靖 時耶  
律制心守上京有捕獲私醞者制心一飲盡笑而不治  
興宗時禁職官不得擅造酒糜穀有婚祭者有司給文始  
聽

道宗清寧八年十一月禁南京不得非時飲酒

熙宗天會三年始命榷酤官以周歲爲滿 十三年詔公  
私禁酒

世宗大定二年詔宗室私釀者從轉運司鞠治 三年省  
奏中都酒戶多逃以故課額愈虧上曰此官不嚴禁私  
釀所致也命設軍百人隸兵馬司同酒使副合千人巡  
察雖權要家亦許搜索奴婢犯禁杖其主百且令大興  
少尹招復酒戶 八年更定酒使司課及五萬貫以上  
者依舊例通注文武官餘並右職有才能累差不虧者

爲之 九年大興縣官以廣陽鎮務虧課而懼奪其俸  
乃以酒散部民使輸其稅大理寺以財非入己請以贖  
論上曰雖非私贖而貧民亦受其害若止從贖何以懲  
後特命解職 十八年三月命戍邊女直人遇祭祀婚  
嫁節辰許自造酒時梁肅爲大興尹上疏言漢武帝用  
桑弘羊始立榷酤法民間粟麥歲爲酒所耗者十常二  
三宜禁天下酒麴自京師及州縣官務仍舊不得沽販  
出城其縣鎮鄉村權行停止時不能用 二十六年省  
奏鹽鐵酒麴自定課後增各有差上曰朕頃在上京酒

味不佳朕欲如中都麴院取課庶使民得羨酒監臨官  
惟知利己不知利從何來若恢辦增羨者酬遷虧者懲  
殿仍更從併增併虧之課無失元額如橫班祇虧者與  
餘差一例降罰庶可激勸 二十七年議以天下院務  
依中都例改收麴課而聽民酤戶部遣官詢問遼東來  
遠軍南京路新息虞城西京路西京酒使司白登縣迭  
剌部族天城縣七處除稅課外願自承課賣酒上曰自  
昔監官多私官錢若令百姓承辦庶革此弊其試行之  
二十九年十二月禁宮中上直官及承應人毋得飲

酒

章宗明昌元年正月更定新課令卽日收辦 中都麴使  
司大定間歲獲錢二十六萬一千五百貫承安元年歲  
獲四十萬五千一百三十三貫 西京酒使司大定間  
歲獲錢五萬三千四百六十七貫五百八十一文承安  
元年歲獲錢十萬七千八百九十三貫 七月定中都  
麴使司以大定二十一年至明昌元年爲界通比均取  
一年之數爲額 泰和四年九月省奏在都麴使司自  
定課以來八年併增宜依舊法以八年通該課程均其



續文獻通考 卷之二十一  
一年之數仍將新增諸物一分稅錢併入通爲課額以後之課每五年一定制又令隨處酒務元額上通取三分作糟酵錢 六年制院務賣酒數各有差若數外置及將帶過數者罪之

宣宗貞祐三年十二月御史田迥秀言大定中酒稅錢及十萬貫者始設使司其後二萬貫亦設今河南使司亦設十餘員虛費月廩宜依大定之例

哀宗天興二年九月禁公私釀酒

元

太宗初酒課驗實息十取一

元之有酒醋課自太宗始初太宗辛卯年立酒醋務坊場官權酤辦課仍以各州府司縣長官充提點官隸徵收課稅所其課額驗民戶多寡定之甲午年頒酒麴醋貨條禁私造者依條治罪世祖至元十六年以大都河間山東酒醋商稅等課併入鹽運司二十二年詔免農民醋課是年二月命隨路酒課依京師例每石取一十兩三月用右丞盧世榮等言罷上都醋課其酒課亦改權酤之制令酒戶自具工本官司拘賣每石止輸鈔五

兩二十九年丞相完澤等言杭州省酒課歲辦二十七萬餘錠湖廣龍興歲辦九萬錠輕重不均於是減杭州省十分之二令湖廣龍興南京三省分辦大德八年大都酒課提舉司設糟房一百所九年併爲三十所每所一日所醞不許過二十五石之上十年復增三所至大三年又增爲五十四所其制之可攷者如此若夫累朝以課程撥賜諸王公主及各寺者凡九所云

天下每歲酒課總入之數  
腹裏五萬六千二百四十三錠六十七兩一錢 遼陽

行省二千二百五十錠一十一兩二錢 河南行省七萬五千七十七錠一十一兩五錢 陝西行省一萬二千七百七十四錠三十四兩四錢 四川行省七千五百九十錠二十兩 甘肅行省二千七十八錠三十五兩九錢 雲南行省貳二十萬一千一百一十七索 俱三百二十枚爲一索 江浙行省一十九萬六千六百五十四錠 江西行省五萬八千六百四十錠一十六兩八錢 湖廣行省五萬八千八百四十八錠四十九兩八錢

世祖中統三年免高麗酒課 至元四年申嚴酒醋之禁  
又申嚴西夏中興等路僧尼道士商稅酒醋之禁 七  
年 勅益都濟南酒稅以十之二收糧 十四年五月  
申嚴大都酒禁犯者籍其家貲散之貧民 十五年正  
月弛女直水達達酒禁 二月以川蜀地多嵐瘴弛酒  
禁 三月以時雨霑足稍弛酒禁民之衰疾飲藥者官  
爲醞釀量給之 十一月開酒禁 十八年五月禁甘  
肅瓜沙等州爲酒 十九年禁大都及山北州郡酒  
二十年申嚴酒禁有私造者財產女子沒官犯人配役

二十一年十二月盧世榮言京師富豪戶釀酒價高  
而味薄以致課不時輸宜一切禁罷官自酤賣向之歲  
課一月可辦從之 二十二年正月詔禁私酒 二月  
申禁私造酒麴 八月罷權酤 初民間聽自造酒每  
米一石得息鈔一十貫增舊十倍至是罷權聽民自造  
但增課鈔一貫爲五貫

胡粹中曰收酒醢課鈔已爲非義况官自酤賣以奪其  
利乎罷權酤而增課鈔五分之四所謂月攘一鷄者也  
二十五年禁遼陽上都桓州應昌隆興酒 以武岡

寶慶二路經寇亂免今年酒稅課 又弛寧夏酒禁

二十七年禁平地忙安倉釀酒犯者死 又禁大同上

都釀酒 免大都平灤河間保定四路流民酒課 二

十八年嚴山後酒禁 二十九年弛甘肅大原酒禁仍

權其酤 弛平灤上都酒禁

成宗元貞元年弛甘州酒禁 大德元年免上都酒課三

年 二年罷葶麻林酒稅羨餘 三年以鄂岳漢陽興

國常澧潭衡辰沅寶慶常寧桂陽茶陵早免其酒課

五年四月禁和林釀酒其諸王駙馬許自釀飲不得沽

賣 十一月詔諭中書近因禁酒間年老需酒之人有

預市而儲之者其無釀具者勿問 以江陵常德澧州

早免其酒醋課 六年禁民釀酒惟安西王等許釀

七年正月以歲不登禁江北陝西甘肅等郡釀酒上都

路應昌府亦乞烈思和林等處依內郡禁酒特弛太原

平陽酒禁及弛京師酒課許貧民釀酒 八年開和林

酒禁立酒課提舉司 九年禁晉寧冀寧大同釀酒已

弛大同路酒禁 十一年以江浙水詔酒醋門攤課程

悉免一年 中書省臣言杭州一郡歲以酒糜米麥二

十八萬石禁之便河南益都諸郡亦宜禁之制可  
 以  
 建康路饑詔免今年酒課山東河南江浙饑禁民釀酒  
 武宗至大元年弛諸酒禁 罷大都權酤 閏十一月以  
 杭州紹興建康等路歲比饑僅今年酒課免十分之三  
 立酒課提舉司

仁宗延祐五年禁大同冀寧晉寧等路開成莊浪等處釀  
 酒 六年禁甘肅行省所屬郡縣濟寧山東諸路釀酒  
 七年時英宗未改元申嚴和林酒禁 弛陝西上都嶺北甘  
 肅河南諸郡酒禁

英宗至治元年以營田提舉司徵酒稅擾民命有司兼權  
 之 真定保定大名順德等路民饑禁釀酒 二年河  
 間路河南淮安諸郡恩州彰德等府饑禁釀酒 弛河  
 南陝西等處酒禁

泰定帝泰定二年以河間真定保定瑞州四路及大寧路  
 鳳翔府饑俱禁釀酒 禁山東諸路成都路及大都順  
 德衛輝等十郡釀酒 弛瑞州路酒禁 三年禁汴梁  
 路釀酒 以涇州饑禁釀酒 弛寧夏成都酒禁 四  
 年禁晉寧路釀酒

文宗天曆元年開上都酒禁復詔被災郡縣禁釀酒 二  
年開遼陽酒禁其奉元永平仍禁釀酒 中書省臣言  
在京酒坊五十四所歲輸課十萬餘錠比者間以賜諸  
王公主及諸宮寺諸王公主自有封邑歲賜宮寺亦各  
有常產其酒課悉令仍舊輸官爲宜從之  
順帝至元二年以興州松州饑禁上都興和造酒至明年  
復開 至正四年河南民饑禁酒 六年陝西饑禁酒  
八年四川饑禁酒 十四年禁河南淮南酒 十五  
年嚴上都路酒禁

醋課

宋

理宗開慶時嚴私醋之禁

金

世宗大定初以國用不足權時權醋以助經用至二十一  
年以府庫充牣罷至章宗明昌五年旋權旋罷承安三  
年省臣以國用浩大復權之五百貫以上設都監千貫  
以上設同監一員

元

太宗甲午年頒酒麴醋貨條禁私造者依條治罪

世祖至元四年申嚴醋禁 二十二年免農民醋課及罷

上都醋課 二十五年權江西醋稅 二十七年免大

都平灤河間保定四路流民醋課

成宗大德十一年免建康路醋課以饑故也

醋課總入之數

腹裏三千五百七十六錠四十八兩九錢 遼陽行省

三十四錠二十六兩五錢 河南行省二千七百四十

錠三十六兩四錢 陝西行省一千五百七十三錠三

十九兩二錢 四川行省六百一十六錠一十二兩八

錢 江浙行省一萬一千八百七十錠一十九兩六錢

江西行省九百五十一錠二十四兩五錢 湖廣行

省一千二百三十一錠二十七兩九錢

油課

金

宣宗興定三年四月同提舉權貨司王三錫請權油歲可

入銀數萬兩高琪主之高汝礪極言不可疏畧曰古無

權法始置鹽鐵酒權均輸官以佐經費未流至有算舟

車稅間架其征利之術固已盡矣然亦未聞權油也蓋  
油者世所共用利歸于公則害及于民故古今皆置不  
論亦厭苛細而重煩擾也國家自軍興河南一路歲入  
稅租不啻加倍又有額徵諸錢橫泛雜役無非出於民  
者而更議權油歲收銀數十萬兩夫國以民爲本當此  
之際民可以重困乎若從三錫議是以舉世通行之貨  
爲權貨私家常用之物爲禁物自古不行之法爲良法  
切爲聖朝不取也若果行之其害有五臣請言之河南  
州縣當立務九百餘所設官千八百員而胥隸工作之

徒不與焉費旣不貲而又創構屋宇奪買作具公私俱  
擾殆不堪言至于提點官司有升降決罰之法其課一  
虧必生抑配之弊小民受累益不能堪其害一也夫油  
之貴賤所在不齊惟其商旅轉販有無相易所以其價  
常平人得易之今旣設官各有分地輒相侵犯者有罪  
是使貴者常貴而賤者常賤其害二也民家日用不能  
躬自沽之而轉鬻者增取利息則價不得不貴而用不  
得不難其害三也鹽鐵酒醋公私所造不同易于分別  
惟油不同莫可辨記今私造者有刑捕告者有賞則無



賴輩因之得以誣告良民枉陷于罪其害四也油戶所置屋宇作具用錢已多有司按業推定物力以給差賦今奪其具廢其業而差賦如前何以自活其害五也惟罷之使上集百官議多以爲不可乃罷

諸色

宋

孝宗淳熙八年詔應稅臨安府及諸路官私房儼不限貫陌十分減三 朱嘉知漳州事奏除屬縣無名之賦七百萬減經制錢四百萬 九年楊甲上書言有司理財

一切用衰陋徧隘之策至于賣樓店括草田鬻官地而所在爭獻羨餘此風日熾恐陛下赤子無寧歲矣

光宗紹熙元年夏議者請令監司州郡寬屬縣無名之取以紓民力時東南月椿錢歲爲緡錢猶三百九十餘萬又有版帳錢者軍興後諸邑皆有之而浙中爲尤甚於是知岳州劉侯令四縣版帳之額爲二萬一千餘緡而無窠名者一萬一千餘緡與提點刑獄丁逢轉運判官薛叔似議盡蠲之

寧宗慶元三年罷文武官納官誥綾紙錢 嘉泰元年蠲

漳民民舊輸黃河鐵纜錢 四年除靜江府昭州折布錢 嘉定四年罷廣西諸州牛稅 趙汝讜奏蠲經總

制無名錢 知漳州莊夏奏罷高荒俵寄產錢

理宗寶慶元年蠲兩浙州軍屬縣官私僦錢有差 八月

詔除豁紹興府每歲經總制虛額錢九萬五千五百貫

十二月詔行都及諸路公私僦舍錢米經減者減三

分從朱端常請也 二年以久雨蠲大理寺三衙臨安

府酒所駐賞錢一歲被蠲者六次後歷年又皆有蠲

紹定四年蠲磚瓦竹木蘆箔之征三月 六年詔兩浙

轉運司臨安府嘉興府徽嚴安吉州竹木之征再蠲三

月 景定四年十二月詔無爲軍巢縣已陞爲鎮巢軍

使從沿江制司節制其月收坊場河渡錢分項起解支

遣以制司申言也

遼聖宗統和十五年十月弛東京魚鰈之禁 開泰八年

六月弛大擺山猿嶺採樵之禁

道宗壽隆六年正月弛朔州山林之禁

天祚帝乾統三年二月以武清縣大水弛陂澤之禁

金

金制租稅之外算其田園屋舍車馬牛羊樹藝之數及其  
藏鏹多寡徵錢曰物力物力之外又有鋪馬軍需輸庸  
司吏河夫桑皮故紙等錢名目細瑣不可殫述又有牛  
頭稅即牛具稅猛安謀克部女直戶所輸之稅也其制  
每來牛三頭爲一具限民口二十五受田四頃四畝有  
奇歲輸粟大約不過一石官民占田無過四十具天會  
三年太宗以歲稔官無儲積無以備饑饉詔令一耒賦  
粟一石四年又詔內地諸路每牛一具賦粟五斗爲定  
制世宗大定時每牛一頭止令各輸三斗後又限民口

二十五算牛一具隨年輸納被災者蠲之貸者俟豐年  
徵還

海陵貞元元年以都城隙地賜隨朝大小職官及護駕軍  
各徵錢有差

世宗大定三年以尚書工部令史劉行義言定城郭出賃  
諸稅 大定末年苦錢幣不通以問宗尹對曰錢者有  
限之物積于上者滯于下所以不通海陵軍興爲一切  
之賦有菜園房稅養馬等錢大定初軍事未息調度不  
繼故因仍不改今天下無事府庫充積宜悉罷去上從

之 二十九年時章宗已即位戶部言天下河伯已許與民同利其七處設官可罷之委所屬禁豪強毋得擅其利

章宗明昌元年正月罷坊場免賃房稅 二年詔減南京

出賃官房及地基錢 承安五年四月省奏舊隨處酒

稅務所設杓欄人以射糧軍歷過隨朝差役者充大定

二十六年罷去其隨朝應役軍人各給添支錢粟酬其

勞今擬將杓欄錢以代添支令各院務驗所收之數百

分中取三隨課代輸約得三十餘萬以佐國用 十四

年五月以河南山東水旱除河泊課聽民自取 十五

年十月弛山場樵採之禁 十九年四月弛山西薪炭

禁 二十二年正月詔民間賣買金銀懷孟諸路竹貨

江淮以南江河魚利皆弛其禁 二十四年十一月弛

太原保德河魚禁 十二月免浙西魚課三千錠聽民

自漁 二十六年置浙東江東江西湖廣福建木綿提

舉司責民歲輸木綿十萬匹以都提舉司總之 二十

八年弛杭州平江等五路河泊蒲魚之禁 二十九年

完澤等言懷孟竹課歲辦一千九十三錠尚書省分賦

于民人實苦之宜停其稅帝納其言 三十年詔免福

續文獻通考 卷之三十六  
建歲輸皮貨及泉州織作紵絲又勅寺僧之邸店商賈  
舍止其物貨依例收稅

成宗貞元二年詔江南道士貿易田者輸田商稅 是年  
詔民間馬牛羊百取其一羊不滿百者亦取之惟色目  
人及數乃取 大德元年減福建提舉司歲織段三千  
疋其所織者加文繡增其歲輸衲服二百 九年真寧  
歲復不登弛山澤之禁聽民採捕 十一年時武宗詔未改元  
山場河泊課程權且停罷聽貧民採取 又以明年改  
元詔再弛山場河泊蘆蕩禁

武宗至大中以紹興災詔山場河灤商稅截日免之  
仁宗延祐六年以濟寧等路水開河泊禁聽民採食 七  
年以瀋陽水旱弛其山場河泊之禁 又以明年改元  
開燕南山東河泊之禁聽民採取

英宗至治二年以真定山東諸路饑弛其河泊之禁  
泰定帝泰定三年弛永平路山澤之禁 四年以歲饑開  
內郡山澤之禁

文宗天曆元年弛被兵郡縣山場河灤之禁 二年河南  
府路乞弛山林川澤之禁聽民採食從之又弛陝西山

澤之禁

額外課 課之名凡三十有二其一曰曆日二曰契本三  
曰河泊四曰山場五曰窰冶六曰房地租七曰門攤八  
曰池塘九曰蒲葦十曰食羊十一曰荻葦十二曰煤炭  
十三曰撞岸十四曰山查十五曰麩十六曰魚十七曰  
漆十八曰酵十九曰山澤二十曰蕩二十一曰柳二十  
二曰牙例二十三曰乳牛二十四曰抽分二十五曰蒲  
二十六曰魚苗二十七曰柴二十八曰羊皮二十九曰  
磁三十曰竹葦三十一曰薑三十二曰白藥其歲入之

數唯天曆元年可攷

曆日課 總三百一十二萬二千一百八十五本計中統  
鈔四萬五千九百八十錠三十二兩五錢 腹裏七萬  
二千一十本計鈔八千五百七十錠三十一兩一錢  
行省二百五十五萬一千一百七十五本計鈔三萬七  
千四百一十錠一兩四錢

大曆課 二百二十萬二千二百三本每本鈔一兩計四  
萬四千四十四錠

小曆課 九十一萬五千七百二十五本每本鈔一錢計

一千八百三十一錠三十二兩五錢

回回曆課 五千二百五十七本每本鈔一兩計一百五

錠七兩

契本課 總三十萬三千八百道每道鈔一兩五錢計中

統鈔九千一百一十四錠 腹裏六萬八千三百三十

二道計鈔二千四十九錠四十八兩 行省二十三萬

五千四百六十八道計鈔七千六十四錠二兩

河泊課數 總計鈔五萬七千六百四十三錠二十三兩

三錢 腹裏四百六錠四十六兩二錢 行省五萬七

千二百三十六錠二十七兩一錢

山場課數 總計鈔七百一十九錠四十九兩 腹裏二

百三十九錠一十三兩四錢 行省四百八十錠三十

五兩六錢

窪冶課數 總計鈔九百五十六錠四十五兩四錢 腹

裏一百九十七錠三十二兩四錢 行省七百五十九

錠一十三兩

房地租錢數 總計鈔一萬二千五十三錠四十八兩四

錢 腹裏九百六十六錠五兩三錢 行省一萬一千

八十七錠四十三兩一錢

門攤課數 總計鈔二萬六千八百九十九錠一十九兩

一錢 湖廣省二萬六千一百六十七錠三兩四錢

江西省三百六十錠一兩五錢 河南省三百七十二

錠一十四兩一錢

池塘課數 總計鈔一千九錠二十六兩五錢 江浙省

二十四錠二十二兩七錢 江西省九百八十五錠三

兩八錢

蒲葦課數 總計鈔六百八十六錠三十三兩四錢 腹

裏一百四十一錠五兩八錢 行省五百四十五錠二

十七兩六錢

食羊等課數 總計鈔一千六百六十錠二十九兩七錢

大都路四百三十八錠 上都路三百錠 興和路三

百錠 大同路三百九十三錠

羊市課 二百二十九錠一十九兩七錢煤木所一百錠

荻葦課數 總計鈔七百二十四錠七兩六錢 河南省

六百四十四錠五兩八錢 江西省八十錠一兩八錢

煤炭課數 總計鈔二千六百一十五錠二十六兩四錢



大同路一百二十九錠一兩九錢 煤木所二千四百九十六錠二十四兩五錢

撞岸課數 總計鈔一百八十六錠五十一兩三錢 般陽路一百六十錠二十四兩 寧海州二十六錠一十三兩五錢 恩州一十三兩八錢

山查課數 總計鈔七十四錠三十六兩三錢 真定路一錠二十五兩八錢 廣平路四十錠五兩一錢 大同路三十三錠五兩四錢

麴課數 江浙省鈔五十五錠三十七兩四錢

魚課數 江浙省一百四十三錠四十兩三錢

漆課數 四川省廣元路一百一十二錠二十五兩八錢

醇課數 總計鈔二十九錠三十七兩九錢 腹裏永平路二十三錠二十五兩四錢 江西行省六錠一十二兩三錢

山澤課數 總計鈔二十四錠二十一兩一錢 彰德路一十三錠四十兩 懷慶路一十錠三十一兩一錢

蕩課數 平江路八百八十六錠七錢

柳課數 河間路四百二錠一十四兩八錢

牙例課 河間路二百八錠三十三兩八錢

乳牛課 眞定路二百八錠三十兩

抽分課 黃州路一百四十四錠四十四兩五錢

蒲課數 晉寧路七十二錠

魚苗課 龍興路六十五錠八兩五錢

柴課數 安豐路三十五錠一十一兩七錢

羊皮課 襄陽路一十錠四十八兩八錢

磁課數 眞寧路五十八錠

竹葦課 奉元路三千七百四十六錠三兩六錢

薑課數 興元路一百六十二錠二十七兩九錢

白藥課 彰德路一十四錠二十五兩

竹木課 腹裏木六百七十六錠七兩四錢額外木七十

三錠二十五兩三錢竹三錠四十兩額外竹一千一百

三錠二兩二錢 江浙省額外竹木九千三百五十五

錠二十四兩 江西省額外竹木五百九十錠二十三

兩三錢 河南省竹二十六萬九千六百九十五竿板

木五萬八千六百條額外竹木一千七百四十八錠三

十兩一錢

續文獻通考 卷之二十一  
竹之所產雖不一而腹裏之河南懷孟陝西之京兆鳳翔  
皆有在官竹園立司竹監掌之每歲令稅課所官以時  
採斫定其價爲三等易於民間至元四年始命制國用  
使司印造懷孟等路司竹監竹引一萬道每道取工墨  
一錢凡發賣皆給引至二十二年罷司竹監聽民自賣  
輸稅明年又用郭峻言於衛州復立竹課提舉司凡輝  
懷嵩洛京襄益都宿开等處竹貨皆隸焉在官者辦課  
在民者輸稅二十三年又命陝西竹課提領司差官於  
輝懷辦課二十九年丞相完澤言懷孟竹課頻年斫伐

已損課無所出科民以輸宜罷其課長養數年世祖從  
之

金銀銅鐵鉛錫珠玉碧甸子歲課

詳見坑冶門

續文獻通考卷之二十九

征權考 雜征中 課鈔

皇明

今甲所載凡私煎礬貨賣者同私鹽法論罪 凡客商匿  
 稅及賣酒醋之家不納課程者笞五十物貨酒醋一半  
 入官於入官物內以十分為率三分付告人充賞務官  
 攢攔自獲者不賞入門不弔引同匿稅法其造酒醋自  
 用者不在此限 若買頭匹不稅契者罪亦如之仍於  
 買主名下追徵價錢一半入官

太祖定金陵之丙午下令曰余自創業江右十有二年軍國之費科徵於民吾民效順輸賦固爲可喜然竭力畝畝所出有限而取之過重心甚憫焉曩因民間造酒糜費米麥故行禁酒之令今春米麥稍平或以爲頗益于民然塞其源而欲遏其流不可也今歲農民無得種糯米以塞造酒之源欲使五谷豐積而價平吾民得所養以樂有生庶幾萬民之富貴也

太祖洪武十三年罷天下抽分竹木坊 二十六年定凡龍江大勝港俱設立抽分竹木局及令軍衛自設場分

收貯柴薪按月給與禁軍孤老等燒用竹木等物堆垛在場令各局按旬奏申知數遇有用度以憑計料揀定數目度量關填勘合支撥如營造數多抽分不敷奏聞給價收買或差人斫辦

三分取一

蘆柴 茅草 稻草 茭苗草 藜草

三十分取一

杉木 軟篾 椽毛 黃藤 白藤

十分取二

松木 松枝 杉篙 杉板 檀木 黃楊 梨木

雜木 檐椽 鋤頭柄 竹掃帚 茭苗苕帚

猫竹 水竹 雜竹 木炭 煤炭 竹交椅

篁竹 黃藤鞭桿 木柴 箭竹

成祖永樂六年設通州白河盧溝通積廣積抽分五局

十三年令照例抽分

三十分取六

松木 栢木 椴柴 椴木 長柴 把柴

雜木塊柴 鞭桿 松木板 煤炸 木炭 檀木

片柴 杉木板 猫竹 水竹 篁竹 杉木篙

車軸 車輞 車輻 雜竹 竹掃帚 箭竹

梢柴 黃藤鞭桿 雜木檐板 石竹篾

茭苗苕帚 芒苗苕帚

三十分取三

稜毛 蒿柴 豆楷 蜀楷桿

三十分取二

石灰 石炭 杉木 甄瓦 黃藤 白藤

軟竹篾 黃楊木

三十分取一

茅草 稻草 蘆草 茭草 穀草 雜草 雜柴

三十分取五

蘆葦

三十分取十五

蘆葦柴

通州等五處抽分竹木局

憲宗成化六年令每處差主事給事中御史各一員按季  
更換每月初六日各造冊與本局官同復 命 七年

令每處止差御史一員

孝宗弘治四年奏准龐村北新安磨石口三廠於盧溝抽  
分局官二員內每季輪差一員管理

世宗嘉靖元年奏准通州抽分竹木局凡商販黃松等木  
曾經真定府九一抽取有印信執照者止用九一抽分  
通前合爲二八其未經真定抽分者仍用二八抽取  
六年裁革白河抽分竹木局官吏軍人撥回原衛所差  
操例該抽分竹木柴炭瓦等項行令廣積抽分竹木  
局帶管仍聽直隸巡按監察御史督察 十年題准盧

續文獻通考 卷之五十九 四  
溝抽分竹木局堆積木植朽壞每年終本部委官查盤  
變賣銀兩解部作正支銷 又奏准今後煤炸已經盧  
溝橋抽分給有小票未會過限者通積等局不許重徵  
十四年題准煤炸每三十分抽取三分 二十四年  
題准煤炸免抽分  
穆宗隆慶四年題准通州等抽分五局除商販竹木板枋  
等項照舊抽分外其馱運木炭柴草俱免抽稅

真定抽分

英宗正統元年設本府稅課司帶管木植三十分抽四分

編號印記從潯沱河運至通州抽分竹木局交收其後  
本府坐委通判一員監督稅課司官吏抽分每年終內  
官監差官印烙起解

憲宗成化四年內官監奏准每年差太監一員往真定府  
會同本府委官抽印木植造辦家火

武宗正德十三年題准真定委本府佐貳官抽分內臣着  
回京再不必差

世宗嘉靖十一年以各工木植缺用內官監奏准仍差官  
抽印不許生事害民 二十二年差內臣於真定潯沱



河督同該府稅課司官抽印木植運赴張家灣料甄廠  
內官監委官驗收 四十五年題准真定府選佐貳官  
一員協同抽分廠太監抽分止抽松杉等木其餘雜木  
荆條竹籃等項及窮鄉下邑不得縱令下人妄行抽稅  
又題准真定抽分木植撫按官嚴行該府同知會同  
該監親自查核抽驗逐日記數明白年終儘見在木數  
以三千根解監外餘木盡數起解本部山臺二廠以備  
工用

穆宗隆慶元年八月 命太監陳學抽木於真定勿以郡

佐叅預故事滹沱河設稅課司主以通判而內臣止歲  
終烙印正德中奏差內官民困稅耗至嘉靖中專委府  
同知至是李芳奏薦陳學廉靜可任吳時來力爭其不  
可不聽 二年議准真定抽分廠免差內官以後每歲  
首發一印信號簿與撫按官令真定府掌印官委同知  
逐日將抽到各木登記隨時變賣銀兩貯庫候冰合之  
日呈繳聽本部酌量題請行府查發

今上萬曆三年題准真定抽分就便專委易州山廠主事  
帶管每年水發之時商木湊集督同該府同知照例抽

分所抽木植照時估變賣價銀貯庫候水合通行解部  
送節慎庫收貯以備該監木植之費如遇各邊緊急添  
造奏請動支不許別項那借 三年內官監奏准真定  
抽分廠仍差內官抽印

杭州荊州太平抽分三廠

憲宗成化七年設每歲本部都水司差官各一員管理凡  
竹木等物每十分抽一分選中上等按季送清江衛河  
二提舉司造船次等年終運至通州造器皿廠造器皿  
餘賣銀聽用後以竹木解運不便各折抽價銀建昌連

二杉板每副抽銀五兩清江連二杉板每副抽銀三兩  
連二松木板每副抽銀八錢雜板每副抽銀四錢真杉  
平板每片抽銀三錢瓦杉板每片抽銀二錢荆竹每根  
抽銀參釐篁竹每根抽銀二釐篁竹每根抽銀一釐白  
竹每把抽銀五釐梳桮每箍抽銀四分桃花洞短杉板  
每片抽銀二錢背陰板每片抽銀二錢南竹每根抽銀  
五釐該送清江衛河二提舉司者徑與支領該送器皿  
廠并原該賣銀者解部召商買料轉發該廠及貯庫聽

用

後題差請 勅月報解課等項俱都水司掌行  
杭州主事兼管造船太平抽分改隸南京工部

保定抽分

英宗天順間設唐縣委官一員前去倒馬關會同抽分木植三十分抽六分本部差官賣銀發唐縣官庫收貯聽用

蘭州抽分

宣宗宣德九年令蔚州及美峪九宮口五福山龍門關等處山場除成材大木不許採取其小木及椽枋之類聽人採取貨賣經過抽分去處每十根抽三根

英宗正統二年奏准大通關并廣利關遇有軍民人等告

拆船隻相料明白無礙逐隻放過開口至本局河下照數拆收不許私拆

憲宗成化五年令京城九門并通州等處抽分局厥例不該抽之物不許擅取 又令順天保定河間等府凡皇親公主并內外官員名下管庄佃戶人等占守水陸關隘抽分勒取財物挾制把持害人者都發邊衛永遠充軍 十七年設本州衛掌印官會同將河橋上岸捉獲木植每十分抽三分過河橋捉獲者盡數入官俱送本處官廠收貯公用

廣寧等處

世宗嘉靖八年山海關太監李能請權稅主事鄔閱言廣寧八里舖既有權場而關內復稅民何以堪本兵覆議從之商民大悅二十五年戶部尚書王杲言國計匱乏請收山場湖陂河道等稅以濟邊儲從之

課鈔事例

凡府州縣稅課司局河泊所歲辦商稅魚課并引由契本等項課程已有定額其辦課衙門所辦錢鈔金銀布絹等物不動原封年終具印信文解明白分豁存留起解

數目解赴所管州縣其州縣轉解於府府解布政司布政司通類委官起解於次年三月以裏到京本部將解到金銀錢鈔布絹等物不動原封照依來文分豁明白劄付該庫交出給印信長單及具手本關領勘合回部照數填寫責付原解官收執將所解物件同原領長單并勘合於內府各門照進且如銅錢布疋赴甲字庫交納鈔錠廣惠庫交納金銀絹疋承運庫交納其勘合既於各門照進該庫收訖就於長單後批寫實收數目用印鈐蓋仍付原解官齎赴本部告繳立案附卷備

照仍令該部主事聽於原解官差批內將實收過數目  
批廻候進課畢日將已解并存用課數通行比對原額  
如有虧欠照依所虧數目具本奏聞類行各司府州  
縣着落辦課衙門經該官吏人等追理足備差人解赴  
京庫交納

凡十三布政司并直隸府州遇有起解稅糧折收金銀  
錢鈔并贓罰物件應進內府收納者其行移次第皆

此做

各布政司并直隸府州課程錢鈔并金銀布帛等項折  
收總計三百六十三萬七百七十八錠有零

外有各處土產茶鹽硝礬朱砂水銀  
等物雖有定額數目瑣碎難以備載

今十三布政司并兩直隸府州每歲折收課程等項

地畝綿花絨二十四萬六千三百斤 絲綿二千九百  
一十八萬三千四百兩絹一十九萬一千九百七十三  
疋零 戶口鈔七千七百三十七萬五千九百二十二  
貫

稅課鈔四千六百一十八萬九十貫 魚課鈔三百一  
十七萬五千三百七十貫 船料鈔二千四百五十五  
萬六千二百四十九貫 各礦銀課共十五萬一千七

百六十七兩

大明令 凡買賣田宅頭匹赴務投稅除正課外每契本一紙納工本銅錢四十文餘外不許多取凡客店每月置店曆一扇在內赴兵馬司在外赴有司署押訖逐日附寫到店客商姓名人數起程月日月終各赴所司查照如有客商病死所遺財物別無家人親屬者告官爲見數行移招召父兄弟或已故之人嫡妻識認給還一年後無識認者入官

凡諸色人等踏造酒麴貨賣者須要赴務投稅方許貨賣違者並依匿稅科斷其自行造酒家用者麴貨不在投稅之限如賣酒之家自無麴貨者須要收買曾經投稅麴貨造酒貨賣依例辦納酒課若係自行造麴者其麴亦須赴務投稅

大誥 天下府州縣鎮店去處不許有官牙私牙一切客商應有貨物照例投稅之後聽從發賣敢有稱係官牙私牙許隣里坊廂挈獲赴京以憑遷徙化外若係官牙其該吏全家遷徙敢有爲官牙私牙兩隣不首罪同巡攔敢有刁蹬多取客貨者許客商挈赴京來

憲綱 一課程仰本府州縣卽將歲辦諸色課程數目逐一開報

事例 洪武初京城置塌房及六畜場停積客商貨物及猪羊等畜聽其兩平交易革罷官私牙行但收免牙錢一分 十八年令酒醋課諸色課若有布帛米穀等項俱折收金銀錢鈔除量存各司府州縣祭祀所用餘令各該司局等官親齎具奏有司帶辦者差吏管解俱次年正月起程直隸府州限正月以裏各布政司限三月以裏到京若金銀鉛硃砂膽礬黃丹青綠毛纓碧甸子

鍾乳粉粽毛水銀俱起解本色其餘魚茶酒醋礬硝鉛粉黑錫粉錫石膏商稅窰課等諸色課俱折收金銀錢鈔 二十三年榜諭各處稅課司局巡攔令計所辦額課日逐巡辦收於司局按季交與官攢出給印信收票不許官攢侵欺致令巡攔賠納違者重罪 令一應課鈔除本處存用外其餘俱解本布政司官庫收貯 又令各處稅課司局商稅俱三十分稅一不得多收 二十四年令三山門外塌房許停積各處客商貨物分定各坊廂長看守其貨物以三十分爲率內除一分官收

稅錢再出免牙錢一分房錢一分與看守者收用貨物聽客商自賣其小民鬻販者不入塌房投稅 二十七年令各處城市沒官房屋但係軍官軍人住者不許取賃錢 永樂元年奏准凡軍民之家嫁娶喪祭時節追送禮物染練自織布帛及買已稅之物或船隻車輛運自己物貨并農用之器各處小民挑擔蔬菜各處溪河小民貨賣雜魚民間家園池塘採用雜果非興販者及民間常用竹木蒲草器物并常用雜物銅錫器物日用食物俱免稅 三年令遼陽稅課司稅課減半 四年

令張家灣宣課司并在京都稅司凡遇客商准麴投稅每百分取二送光祿寺准塌房條稅課鈔每歲所送止十五萬斤如有餘存留下半年支用 令張家灣宣課司課鈔減半 五年令正陽門等宣課司一應雜貨輪日挨次於條由內開寫普安等三店卸賣其 給賜各官福順等店亦照例每店僉大戶二名看管按季更替該抽貨物各官親屬斟酌抽取不許容留親戚詐稱家人在店攪擾仍行巡視塌房御史訪察禁革但有更易姓名營求看店及私充牙行者軍發邊衛充軍民發口



外爲民 六年令六畜場塌房課鈔江東宣課司帶收  
進納二名或四名看管順天府及二縣拘集各行依時  
估計物貨價值照舊折收鈔貫仍造冊二本一本發都  
稅司一本送部查考巡視塌房御史務禁管店小脚不  
得攬納客商課程以不堪鈔抵數送官及邀截客貨騙  
害商人其收稅則例上等羅段每疋稅鈔二十五貫牙  
錢鈔二十五貫塌房鈔二十五貫中等羅段每疋稅鈔  
一十五貫牙錢鈔一十五貫塌房鈔一十五貫下等羅  
段每疋稅鈔一十貫牙錢鈔一十貫塌房鈔一十貫上

等紗綾錦每疋青紅紙每一千張篋子每一千箇稅鈔  
六貫七百文牙錢鈔六貫七百文塌房鈔六貫七百文  
中等紗綾錦每疋細羊羔皮襖每領黃牛真皮每張扇  
骨每一千把稅鈔五貫牙錢鈔五貫塌房鈔五貫青三  
梭布每疋紅油紙每八千張冥衣紙每四千張鐵鍋每  
套四口藤黃每斤稅鈔四貫牙錢鈔四貫塌房鈔四貫  
褐子綿紬每疋毛皮襖氈衫每領乾鹿每箇稅鈔三貫  
四百文牙錢鈔三貫四百文塌房鈔三貫四百文官絹  
官三梭布每疋絨線每斤五色紙每四千五百張高頭

黃紙每四千張稅鈔三貫牙錢鈔三貫塌房鈔三貫小  
絹白中布青匾線夏布每疋手帕每連三箇手中每十  
條皮褲每件小靴每套三雙板門每合響銅每斤連五  
紙每千張連七紙每一百五十張稅鈔一貫牙錢鈔一  
貫塌房鈔一貫青大碗每二十五箇青中碗每三十箇  
青大碟每五十箇稅鈔七百四十文牙錢鈔七百四十  
文塌房鈔七百四十文洗白夏布青綠紅中串二布每  
疋包頭每連二十箇氈條每條大碌銅青碌枝條碌生  
熟銅蘇木胡椒川椒黃蠟蔴菇香葷木耳每斤酒壘上

酒海每箇青中碟每五十箇白大盤每十箇書房紙每  
四箋筆管每五百箇油靴每副稅鈔六百七十文牙錢  
鈔六百七十文塌房鈔六百七十文青小碟每五十箇  
白中盤每十五箇稅鈔六百文牙錢鈔六百文塌房鈔  
六百文花布被面每段白中串二布每疋靛花青紅花  
針條每斤青靛銀杏菱米蓮肉軟棗石榴每十斤青大  
盤每十二箇青盤每十五箇青小盤每十二箇青小碗  
每三十箇乾鷺天鷺等野味每隻南豐大箋紙每四塊  
竹椅每把稅鈔五百文牙錢鈔五百文塌房鈔五百文

喜紅小絹每疋稅鈔四百七十文牙錢鈔四百七十文  
塌房鈔四百七十文麻布每疋花椒水牛皮每斤土  
青盤每十五箇土青碗小白盤每二十箇土青碟每五  
十箇青茶鍾七箇稅鈔四百文牙錢鈔四百文塌房鈔  
四百文小麗綿布每疋氈襪每雙土降香白砂糖錫每  
斤草席每領雨傘每把翠花每朵草花每十朵刷印馬  
紙每四塊上尺八紙每塊南豐箋紙每六塊連三紙每  
一千張毛邊紙中夾紙每一百張酒麴每十塊稅鈔三  
百四十文牙錢鈔三百四十文塌房鈔三百四十文燈

草每斤土青酒鍾土青茶鍾每十二箇土青香爐大白  
碗每十箇中白碗每十五箇白大碟每二十箇白小碟  
每二十五箇稅鈔三百文牙錢鈔三百文塌房鈔三百  
文馬牙速香魚膠每斤稅鈔二百四十文牙錢鈔二百  
四十文塌房鈔二百四十文藥材每斤白小碗每十五  
箇稅鈔二百文牙錢鈔二百文塌房鈔二百文荔枝圓  
眼冬笋松子桐油柏油黑砂糖蜂蜜每斤臘脂每兩  
土粉土硝賺松香墨煤蒜麻肥皂末香槐花膠棗雞頭  
螃蟹蛤蜊每十斤乾兔鷄鴨每隻白茶鍾每六箇甘蔗

藕每十根竹筍每一百雙竹掃帚每十把蒲席每領雜  
毛小皮每張氈帽每箇草鞋每十雙稅鈔一百七十文  
牙錢鈔一百七十文塌房鈔一百七十文乾笋蒲筍海  
菜金橘橄欖牙棗芋蔞每斤稅鈔一百四十文牙錢鈔  
一百四十文塌房鈔一百四十文綿花香油紫草紅麩  
紫粉黃丹定粉雲香柿餅栗子核桃林檎柑橘雪梨紅  
棗楊梅枇杷榛子杏仁蜜香橙烏梅五倍子鹹蛋黑乾  
笋葉茶生薑石花菜蝦米鮮乾魚鮮猪羊肉黑鉛水膠  
黃白麻錮熟鐵每斤綿絮每套蘆席每領綿臘脂每帖

西瓜每十箇稅鈔一百文牙錢鈔一百文塌房鈔一百  
文乾梨皮芋薺芋頭鮮菱烏菱鮮梨鮮桃杏子李子鮮  
柿柿花熅硝皂白礬溼青生鐵每斤乾葱胡蘿蔔每十  
斤冬瓜每十箇蘿蔔菠芥等菜四十斤稅鈔六十五文  
牙錢鈔六十五文塌房鈔六十五文其餘估計未盡物  
貨俱照價直相等則例收納其進塌房鈔并抽分布足  
及按月該納房鈔俱爲除免 七年令京城九門收鈔  
鋪戶每季各門止役三人 天順元年令各處稅課司  
局該辦課程照永樂年間舊額徵收其課鈔不及萬貫

者俱革罷令所在有司帶管 成化元年令京城九門  
并都稅宣課等司及各處商稅等項課俱錢鈔中半兼  
收每鈔一貫折收銅錢四文 六年令每鈔一貫折收  
銅錢二文 又令商稅課照舊收鈔 十五年令京城  
九門監收錢鈔內官及各處抽分廠不許將不該抽貨  
物違例抽分 又令巡城御史會同本部委官凡遇九  
門每月檢收鈔錢進庫各用紙筆蘆席車脚等項於所  
收錢鈔內扣出易買其崇文宣武朝陽東直四門每門  
添撥辦事吏一名正陽等五門添撥辦事吏一名助收

錢鈔 二十一年令順天府委佐貳官一員於正陽門  
稅課司崇文門宣課分司監收商稅課鈔 弘治元年  
令差御史主事各一員於崇文門宣課分司監收商稅  
又令在京崇文等九門上新河張家灣臨清淮安揚  
州蘇州杭州劉家隔正陽鎮各稅課司局每鈔一貫折  
收銀三釐每錢七文折收銀一分解京庫其存留者折  
支官軍俸糧每銀一兩折鈔七百貫 又令官吏監生  
軍校家下供送車輛不係客商串同帶貨者免收稅  
又令客商販到諸貨若係張家灣發賣者省令赴局投

稅若係京城發賣者以十分爲率張家灣起條三分崇文門收稅七分如張家灣不曾起條崇文門全收 令順天府委官二員於草橋及盧溝橋宣課司監收商稅 五年令在京宣課司監收商稅止照舊例不許分外搜求有傷治體 六年令差官於江西浙江蘇州揚州淮安臨清稅課司局查照舊例定爲則例收稅按月稽考自後不許再委隔別衙門官員侵管重復擾民仍各照額辦歲辦之數年終通照鈔關事例造冊奏繳 又令崇文門宣課司商稅止差主事監收不必御史巡察 十三年奏准在京在外稅課司局批驗茶引所但係一應稅納錢鈔去處着令客商人等自納若權豪無籍之徒結黨把持攔截生事及將爛鈔低錢搪塞攪擾商稅者問罪枷號三箇月發落

已上商稅課程俱載 國初以來著令至今見行其宣德及正統間爲鈔法不通加增之數見鈔法項下 弘治五年令雲南每年該徵差發銀八千八百九兩五分定爲常例自十六年爲始每年折買金一千兩足色二分九成色三分八成色五分與每年額辦金六十六

兩六錢七分并餘剩銀兩一同解部轉送承運庫交納  
十八年裁革板坑水銀場局大使等官待後該徵之  
時行本縣掌印官帶管 正德十四年奏准廣東鐵稅  
置廠一所于省城外就令廣東鹽課提舉司正提舉專  
管鹽課副提舉專管鐵課凡一切事宜聽巡鹽御史總  
理其惠州潮州揭陽縣三處及雷瓊等處行鐵地方但  
有走稅夾帶漏報等項奸弊俱照鹽法事例施行

課鈔總數

孝宗弘治十五年課鈔計三百一十七萬五千三百七十

貫

世宗嘉靖二十三年課鈔計三百一十七萬七千一百一  
十貫

今上萬曆六年課鈔

順天府九門并都稅等司門攤課鈔六十六萬五千一  
百二十貫銅錢二百四十三萬二千八百五十文  
崇文門宣課分司商稅大約銀共一萬九千八百十六  
兩銅錢一千八百八十七萬七千七百文條稅大約  
一萬五千九百九十六兩船稅銀四千五百十五兩

通州張家灣宣課司商稅大約銀三千零九兩銅錢二百八十八萬七千七百六十文麴十五萬二千八百斤條稅銀一百五十五兩六錢船稅銀二十二兩七錢

通州鹽牙稅銀五百五十五兩

永平府稅課鈔四萬八百五十五貫七百十文

保定府稅課鈔十七萬七千四百二十九貫三百十三

文

河間府稅課鈔十一萬五千三百四十二貫一百十四

文

真定府稅課等鈔十一萬七千五百六十九貫八百三

十文

順德府稅課等鈔二萬九千五百三十九貫六百七十

二文

廣平府稅課鈔四萬三千五百七十一貫四百七十九

文

大名府稅課鈔十萬七千八百三十八貫八百四十文

應天府商稅門攤等課鈔三百三十六萬六千三百八



十貫六百十七文餘鈔九百六十三萬九千三百五  
六十餘貫

江東瓜埠巡檢司船料稅十二萬一千五百二十四貫  
南京五城兵馬司房鈔一百六十一萬八千四百三十  
八貫八百文

龍江石灰山大勝三關船料鈔五十萬三千六百八貫  
安慶府稅課等鈔共三十五萬二千三百二十六貫  
蘇州府稅課等鈔六十九萬二千一百八貫一百二十  
一文

松江府稅課等鈔四十二萬七千一百六十二貫九百  
六十四文

常州府稅課等鈔二十四萬二千八百六十六貫八百  
七十一文銅錢四十八萬五千七百三十九文

鎮江府稅課等鈔三十三萬八千五百五十六貫三百四十  
文

廬州府稅課鈔二十七萬三千七百六十七貫二百七  
十六文

鳳陽府稅課等鈔五十三萬四百四十六貫九百二十

文

淮安府稅課等鈔二百二十六萬九千八百六十三貫

二百五十二文

揚州府稅課鈔八十六萬七千二百七十六貫七百六

十文

徽州府稅課鈔十四萬五百七十貫五十七文

寧國府稅課等鈔十九萬三千二百二十九貫九百五

十八文

池州府鈔六萬九千二百三十七貫六百三文

太平府鈔十四萬二千三百五十二貫七百九文

廣德州鈔九萬一千四百八十七貫三百五十二文

徐州鈔三十四萬三千九百十七貫二百文

滁州鈔五萬三千九百五十六貫三十文錢五萬三

千九百五十八文

和州鈔六萬二千九百九貫四十文

浙江鈔三百萬五千二百三十九貫八百二十一文

江西商稅銀三千二百九十五兩六錢九分

湖廣鈔五十五萬七千九百十四貫三百三十七文

山東鈔折銀八千八百六十一兩三錢九釐九毫

河南鈔二百三萬四千一百二貫三百四十七文

福建商稅課鈔二十六萬七千三百三十六錠五貫五

百九文

陝西鈔一百七十二萬一千六百六貫六百七十七文課小

麥二千四百九十三石四斗課銀四兩六錢五分六

釐

山西鈔四十四萬七千六十四貫七百九十文

廣東南雄府太平橋每歲南北抽盤商稅鐵課等銀四

萬三千餘兩

廣西稅鈔八萬七百九十三貫八百四十一文

四川稅鈔五十四萬四千七百十八貫二百四十六文

雲南稅鈔一萬三千七百六十四兩二錢五分五釐米

麥九百四十四石八斗八升八合五勺海肥五千七

百六十九索二十手

貴州稅鈔十四萬八千三百六十三貫二百九文

今上萬曆六年魚課鈔

保定府鈔四千七百七十一貫七十文

河間府鈔一萬五千七百十七貫七百六十文

大名府鈔七千七百十貫五十一文

直隸應天府鈔九萬九千四十九貫一百三十文

蘇州府鈔二千一百七十四貫四百文解南京戶部

松江府鈔五百五十七兩四錢六分三釐解部

常州府鈔三萬四千九百八十一貫九百五十五文

銅錢六萬九千九百六十四文解南戶部

鎮江府鈔五千一百六十四貫解南戶部

廬州府鈔二萬六千三百八十二貫五百文解部

揚州府鈔十二萬一千五百一貫三百三十二文存

留

太平府銀一百十七兩二錢四分八釐解部

浙江鈔十八萬二千九百六十九貫六百二十文

江西銀一千四百八十兩五錢三分解部

湖廣鈔一百二十六萬五千四百二十四貫

福建銀七千一百兩

山東鈔三百四十四貫

河南鈔七千二百六十八貫七百四十二文

陝西鈔二萬三千九百十二貫九百四文

廣西鈔二千七十九貫五百三十文

四川銀三百三十七兩五錢七分九釐解陝西

雲南銀一千三百五十三兩七錢八釐米麥三百五十

石五斗

設關處所

河西務 臨清 九江 潁潁 俱戶部差

淮安 揚州 杭州 俱南京戶部差

船鈔商稅

凡差官萬曆二年給北新淮安揚三鈔關監稅員外主  
事等官不坐名 勅書三道差滿更替之日同原降關  
防傳流收掌 七年題准七鈔關收稅銀兩除稽考文  
簿照舊堆報外仍立稅票將納過錢鈔銀兩照簿填給  
船商徑投所在官司收候每季解銀備造一冊并原收  
稅票送部磨對

凡收鈔規則萬曆七年題准各關解納本色錢鈔以後  
照例算銀按季總委府州縣官員給文定限解部行崇

文門及九門鹽法委官處公同收買錢鈔送廣惠庫交  
納不得仍差庫役人等領買以致興販遷延  
凡收稅萬曆二年題准將順永保河四府商稅除應留  
本處支用外其應解餘稅銀兩每年定限上下半年二  
次解部濟邊不許擅用 八年題准將淮安府四稅行  
管理淮安倉主事兼管批立稅票給發委官驗數收銀  
貯庫聽撫按作正支銷如有餘類解太倉 十一年題  
准行河西務管關主事凡商貨係進京者本關給與紅  
單赴崇文門宣課司併納正條船三稅其不係進京發

往四外賣者本關止收正稅將條船二稅俱與除免  
議准一應商貨如在臨清發賣者照舊全稅在四外各  
地方發賣者臨清先稅六分至賣處補稅四分其赴河  
西務崇文門卸賣者臨清先稅二分然後印發紅單明  
註某處發賣給商執至河西務崇文門補稅八分共足  
十分之數仍刻示關前示諭各商遵守 十二年題准  
行保定撫按將原裁各關商稅照舊開復每年四季選  
委佐貳官從公抽收貯阜平倒馬井陘三庫專備修築  
臺牆之用 議准湖廣黃荆岳等府設有印信司局照

續文獻通考 卷之二十一  
舊外其長常二府并興蘄等七十七州縣雜稅辰漢二府州鹽木油稅常德府茶炭稅俱仍舊抽收每年扣銀解部餘存備祿糧等用武昌大冶隨州等六州縣稅銀支費照今減定數目徵解至於省城船料鹽稅聽備兵餉給賞等費如有不敷仍于該省船料鹽稅轉用餘存銀兩聽備俸祿及修造漕船等用

凡蠲稅萬曆十一年因議革淮安過埧斛抽脚抽等稅題准通行兩京十三省各撫按官嚴查所屬除額設有印信稅課衙門外凡私設一應無名課稅盡數查革

又題准陝西漢中府革稅咸陽縣皮布稅及涇成靜平等一十七州縣并雲陽永樂二鎮店私立稅銀盡行裁革十二年題准湖廣鄖襄承衡四府新化嘉魚六溪口鹽稅紙價漢川縣劉家隔黃岡縣陽邏巡司與德安等十九州縣雜稅牙稅河稅并孝感應城等十四縣茶稅盡數裁革

### 漁課事例

皇明魚課每歲南京戶科編印勘合通計四川等布政司并直隸河間等府州縣河泊所等衙門該勘合六百八

十九道皆以河字爲號南京戶部領回發各該衙門收掌各記取收魚課米鈔若干年終送繳其勘合底簿仍送戶部如各衙門繳到勘合務比對朱墨字號相同於上明白填寫以憑查考 各省直河泊衙門 累朝建革不一其已革衙門魚課仍于各府州縣帶管或歸併附近河泊所歲辦不缺

大誥 詔所在湖池河泊地里從古至今辦集課程一定不易之所適年以來姦邪小人受任將從古以來不係辦課所在小溝小港山澗去處下流雖通辦課去處其

小溝小港山澗及灌溉塘池民間自養魚解池澤皆已照地起科并不係辦課去處小人生事貪心無厭搜求擾民將農民小溝小港山澗灌溉池塘養魚池澤取魚罾網罩籠之類一槩搜拏聲言要奏如此虐民今後敢有仍前奪民取採蝦魚器具者許民人拏赴有司有司不理拏赴京來議罪臬令以快良民之心 又令所在湖池民舟經涉其河泊之官敢有妄取水面錢者罪不赦 又令各處魚課有湖池堙塞坍塌無從採捕累民包納者所在官司申按察司及巡按御史踏勘分豁



續文獻通考 卷之二十一  
太祖洪武十八年令各處魚課皆折收金銀錢鈔 三十年令自懷慶以下至沙河口一帶黃河兩岸聽從百姓採取魚鮮食用不收課程原設河泊所革去魚課開除魚戶發回有司當差

宣宗宣德七年令湖廣廣西浙江魚課辦納銀者每銀一兩折鈔一百貫

英宗正統二年令湖廣荊州府所屬州縣并河泊所等衙門魚課鈔俱存留本處爲王府祿米及官吏俸給年終具數造冊及餘剩鈔見數印封解送京庫 七年奏

准各處魚膠不及百斤課鈔不及百貫米不及十石者聽於本處上司或附近河泊所類解 令湖廣所屬府縣河泊所歲辦課鈔不及三千貫油鰔黃白麻不及三千斤翎毛不及十萬根者俱裁革該辦課程歸併附近河泊所管辦無河泊所處令府州縣帶辦 十年奏准雲南大理府所屬河泊所魚課米中半納鈔

景皇帝景泰六年令湖廣等布政司各委官取勘漁戶凡新造船有力之家量船大小定與課米編入冊內以補死絕業戶課額

續文獻通考  
卷之二十九  
英宗天順元年令各處河泊所業戶逃亡事故者有司查  
勘以新增續置船隻罾網照名補替

孝宗弘治二年令以湘潭縣河泊所與吉府管業

武宗正德元年議准天下河泊所并稅課司但係王府  
奏討管業者不分年月久近盡取還官十五年奏准  
寶應縣原額魚戶專辦課鈔麻翎鰓料其別項雜差照  
舊除免

世宗嘉靖八年議准天下王府分封日增稅糧日益不  
足凡河泊所稅課局并山場湖陂除洪武永樂以前

欽賜不動外其餘一應奏討之數自本年爲始將所入  
花利照數徵收存留本處府縣倉庫抵補王府祿米  
如有占愆不退及再行奏討者將該府撥置人員叅問  
發遣三十七年議准饒州府屬額設收課柴棚局河  
泊所長港田另召人戶承佃納課仍於舊額銀加徵二  
倍以三分之一徵解送淮府其二分并全額課銀貯  
饒州府庫聽用

續文獻通考卷之二十九終

續文獻通考卷之三十六

征權考 雜征下

雜課

有捕獲盜賣者賞銀十兩

世宗嘉靖九年議准各撫按官轉行司府州縣等官凡山澤之利除禁例并係民已業外其餘備查某處已經納稅某處空閒內某處堪聽民採取某處堪入官備賑務在官民兩便 二十五年議准 楚府先年占管民房曾經撫按委官勘斷給主者不許聽從下人撥置捏情爭占各民承管房基仍照例起科如金沙洲一帶每間

每歲徵銀一錢在漢口者減半徵稅俱解本布政司以備各王府欠缺祿糧墳房料作之數二十六年題准陝西巡按御史將甘肅鎮守太監副總兵遺下磨課課程地畝餘銀園圍課程銀稽查明白通融分發各衛收掌公用置立循環簿倒換查考其原派店戶流民酒屠油舖等行銀兩俱停革二十七年令各王府奏討山場稅課等地并楚府魚課稅課蘆洲店房俱還官徵租備邊查數奏報

穆宗隆慶元年十月刑科孫枝言都城九門稅課定有則

例適年倍徵橫索弊孔滋多請自今分屬五城御史各委兵馬一員監收歲中會同部官覆奏其原設監生吏典悉行裁革上從之仍令申明原定則例榜示二年五月工部言杭荆二廠蘆溝橋等局漏稅甚多有欺隱抵換包攬侵克等弊自今廠稅責成主事督同該府佐貳官親自驗收互相稽察局稅責巡視御史及各主事查盤估計如法上是之五年四月詔免林衡署果戶房號稅初永樂時有果戶三千餘後漸逃竄僅存七百餘戶嘉靖間復徵其房號至是果戶高稅等奏

愬貧難 上亦憫之故有是 命 又工部吳時來請  
停差中官之榷木真定者以其事屬之府佐得 旨允  
行 二年六月 詔停差真定押木內臣歲令府佐領  
之時太監李芳以異災頻仍奏先年差官侵漁宿弊及  
諸府管解之苦請以明年爲始勿遣內臣抽印止委府  
佐仍以抽過木植易銀濟邊工部是其議故有是 命  
今上萬曆二十四年十二月管理通灣店稅太監張燁奏  
千戶趙承勳等誣捏國事欲撓國課奉 旨逮捕與吳  
實等面質侵欺奸弊該季錢着張燁上緊催征不許延

誤 二十五年正月應天巡撫趙可懷奏六合商稅抵  
補止三百兩而設一局其間能無強勒能無贏餘恐祇  
爲局官吏書借竇且近聞此處商旅率多稱苦是不可  
不爲之一問夫軍需不缺則不病國編派不加則不病  
民抽取不及則不病商夫使商而又使國便民則革之  
善者也有 旨該部知道 騰驥右衛百戶鄭惟明奏  
差官往天津等處徵收商店稅租奉 旨店名廣安着  
御馬監太監王朝同原奏官前去徵收店稅寫 勅與  
他 二十五年管理天津店稅太監王朝奉差循例博

採輿情的徵收完規額等事奏徵收各項雜貨稅銀乞  
勅戶部行有司遵行從之

按雜稅進銀始此嗣後各直省內臣貢獻無定期不可  
勝書矣

二十五年七月直隸巡按馬從聘奏臣奉 命催償糧  
運過德州見山東司道等官言近日泰山崩開一處相  
離一里有餘共相驚訝以爲非常之異及至天津見邸  
報始知 殿廷被災視昨歲 兩宮之災更加酷烈蓋  
不勝悲歎謂適年時事多舛災報頻仍然未有昭明顯

赫如此之甚且并見于一時者也而開礦一事尚未允  
停及見錦衣衛指揮楊宗吾參究原奏官許廷棟恐嚇  
官民財物假雕印信關防等事雖奉 旨允行撫按提  
問而開納如舊 皇上將謂懲此一人遂可盡絕騷擾  
之害全享開採之利乎礦之蠹費殃民招釁啓亂前後  
諸臣言之已盡臣無容贅獨計泰山者五岳之宗百靈  
之會也一日崩移豈無自致蓋地脉宜于厚藏靈氣忌  
于宣洩年來開礦之使分道四出無論有礦無礦一槩  
開挖斬絕地理之綱維毀傷山川之靈氣泰山之崩兆

續文獻通考 卷之三十一  
實應此及今停止尚悔其遲若再因循更復何待昨輔  
臣所奏專責撫按官領勅收採取盈今數尚爲委曲  
遷就之說實未盡拔本塞源之論况原奏各官盡無藉  
乞巧之徒資身無策借名獻礦因而窟穴其中藉威生  
事騙詐擾民無所不至而仲春實爲之倡曾經河南撫  
按連章叅奏原疏見在可復而核也至于眞定等處奏  
官鄭一璘等初至地方尚騎馬張蓋旣而乘轎辟人卽  
投靠棍徒亦抗禮縣官嚇取財物况閭閻細民其何以  
堪紀綱凌壞已極人心痛怨入骨種種惡孽俱不在許

廷棟之下懇祈 皇上當此天怒已甚事勢已極屏絕  
貨殖之私亟下更始之令將先後遣使悉行 召還仍  
行各地方撫按查原奏官所犯罪狀據實 上聞分別  
議處用彰 皇上改過不吝之誠以洩萬姓積憤不平  
之氣實今日消弭之一大端也 山東開礦太監陳增  
奏福山知縣韋國賢等阻撓礦務監禁奉差旗校 上  
以差去旗校乃奉 旨體訪各處礦務韋國賢這廝不  
遵 君旨阻撓抗違又擅拿 欽差人役蟻視 國法  
好生可惡着錦衣衛便差的當官校并楊萬年高應第

都扭解來問萬象春黨庇逆官欺蔽不敬且着罰俸一  
年 二十六年四月管理通灣店稅太監張燁奏勢豪  
憑藉欺隱 國課得 旨奸商劉一朋着錦衣衛便差  
的當官校扭解來京究問 天津督徵店租太監王朝  
奏南兵鼓噪成風強毆領 勅內臣得 旨狂役生事  
的也着王朝分別處治務要各令心服畏法安戢 六  
月太監王朝進租銀二千兩奉 旨此租稅并通灣店  
課及各處開採礦務俱係武職官土人奏請助工濟邊  
之資該地方有司官員全無爲 國恤民之意視爲胡

越不肯着實遵行這所奏稅租錢糧爲重且該地方官  
亦有同事之責以後府衛首領州縣佐貳以下部兵千  
把總等官悉聽爾職委防守如有疎虞不宥 七月神  
武左衛千戶宋仁奏請湖口縣設稅 九月天津巡撫  
汪應蛟奏徵租店使病故查報見在錢糧并乞俯 賜  
停差以蘓民困奉 旨店稅徵租原爲彼處官民所奏  
遵行已久何乃遽欲停差汪應蛟旣膺海防重任親見  
軍旅煩費不能畫一竒策足兵足食節財省費而乃循  
羣小喜事之輩要名妄瀆姑且不究 十二月太常少



續文獻通考 卷之三十一  
卿傅好禮奏假官抽稅奉 旨這所奏畿內無名克棍  
輒敢擅豎黃旗假官抽稅虐害小民好生可惡便着廠  
衛差的當官校拏扭來說初九日復奏奉 旨 畿輔  
小民窮苦朕豈不知體念但政務煩冗事幾叢集少候  
自有裁度傅好禮這廝既有前本如何不聽候 朝廷  
處分輒敢逞臆瀆擾顯然要挾 君父好生無上本該  
拿究姑且降三級調用不許朦朧推陞今後再有這等  
的原奏之事停寢本人重治不饒 大理卿吳定奏請  
宥直臣以宣德意 上以其出位黨護傅好禮降雜職

定降三級俱調邊方用不許朦朧推陞 太監馬堂奏  
土虎張子和等阻撓打搶 上令錦衣衛逮問 二十  
七年二月留守後衛千戶張宗仁奏敬陳末議請復舊  
課等事奏徵杭嘉寧紹湖貨稅奉 旨這所奏浙江舊  
有市舶稅課見今尚復徵收就着奏內崇文門奉御劉  
成督率原奏官民前去會同彼處撫按等官照例徵收  
解進以濟國用不許擾害地方寫 勅與他 三月天  
津徵稅太監馬堂奏亟議加增界內舖店牙課等事奏  
每年再加銀二十萬兩奉 旨是天津臨清徵稅銀兩

每年如數解進不許疎漏隱匿 錦衣衛百戶柳勝秋  
奏懇 恩查閱原奏并乞 聖旨以便遵守事奉 旨  
這所奏密雲縣地方貨物稅課都遵照 勅諭開載徵  
收不許重疊困累商民還着內官王忠張燁會同該撫  
按官議定具奏該部院知道 管理通灣太監張燁奏  
年例事竣恭進租銀三千三百一十餘兩奉 旨銀兩  
着進收通灣租課地方着會同天津馬堂分定經界以  
蘇商困今後不許越境互相重複徵收戶部知道 四  
月儀真太監暨祿奏商民抗 旨阻撓叅守禦楊應光

坐視不救又巡視南京西城馬嗣元題有百戶前來本  
京上新河本舖地方豎立旗杆收攔江稅鈔出示每貨  
一兩納稅三分并搭包皮箱一應物件俱要盤驗明白  
方准放行比有沿江灣泊船隻約千餘人不服將百戶  
隨從人毆打又大學士沈一貫揭爲京口儀真差官抽  
稅乞 賜停免奉 旨 朕覽卿奏情詞迫切具見忠  
愛至意連年以來西征東討兼發賑濟以致帑藏匱乏  
目今 兩宮雖已就緒 三殿將次興工且有應行典  
禮若非設處財用安忍加派小民所奏兩處地方不遠

京口聞已免差遣儀真縣處照前 旨行 錦衣衛百  
戶陳道元奏蘇松常鎮四府抽取商稅每年可進五六  
萬兩 千戶游俠奏奸險府官吳寶秀等朋謀抗 旨  
上欲重擬大學士沈一貫揭請得准送法司擬罪具  
奏 天津徵稅太監馬堂叅守備王煬奉 旨王煬蓄  
謀調度大肆猖狂已有 旨了首惡王朝佐等着該撫  
按等官遵 旨上緊嚴拿具奏不許徇私延緩馬堂着  
策勵供職還要禁止額外需索不許濫用匪人 又  
諭奉御陳奉曰湖廣江西地方隔省不同濫差曠遠征

收殊失 朝廷裕國通商之意各處稅課著照撫按所  
管行若有聽信撥置妄行奏擾一併治罪不饒 五月  
錦衣衛千戶韋夢麒奏湖廣荊州地方原有辛効忠店  
房曾經 遼藩竊據抽稅復有張居正私意革免前稅  
今被土豪奸棍侵費 上命原奏官民前去彼處守備  
內官會同撫按作速查明具奏不許徇私隱蔽 淞江  
巡撫劉元霖奏愚民聚譁懇乞矜宥并 勅權使嚴禁  
約杜奸萌以安東南重地奉 旨朝廷差官稅課原爲  
裕 國通商征收經紀之羨餘何乃各該有司官不能

仰體奉行以致人心驚擾這奏內倡亂首惡便着嚴行  
拿究題請正法其餘脅從悉皆赦宥還明白曉諭撫按  
地方今後務體朝廷德意公同調停如勅奉行不  
得仍前坐視成敗一體治罪不饒鷹揚衛正千戶王  
宮柱奏河南彰德府鄧州等處土產貨物及各馬稅課  
有裨國用上命開礦太監魯坤管徵不妨礦務督率  
原奏官民前去彼處會同撫按等官照例徵稅及馬匹  
解進不許擾害地方遼東徵稅太監高淮奏奸商結  
黨阻撓奉旨這所奏開原廣寧山海關羅城地方客  
商聚衆鼓噪干總陳事忠及指揮齊汝功等不行救護  
好生可惡陳事忠等并行克首惡趙良輔等都着撫按  
官嚴行提拿分別奏請正法不許怠玩徇私容縱其餘  
脅從俱赦宥又奏山海關內舊有鎮守府一所見今  
空閒改爲福德店進置店銀五百兩山東徵稅千戶  
喬嵩奏德州清寧徐州南界等處稅課每年可加銀四  
萬兩與原額共銀十萬有裨國事上命內官陳增遵  
照勅諭會同撫按等官照例收徵銀兩一併解進馬  
堂着遵勅旨督管徵收臨清天津等處錢糧朝廷

開礦徵稅原爲裕 國通商愛民德意何乃原奏官民  
不知仰體又不由 欽差內官督率奏請輒懷私弊往  
往辯爭朦朧瀆擾殊失體統今後各處敢有違法的着  
彼處內官嚴拿叅究治罪 太監李鳳奏廣東廣州府  
及太平橋海嶺等處稅課 上命會同撫按官遵照  
勅旨照例徵收銀兩解進以濟 國用爾須潔己奉公  
不許重徵疊收困累商民 燕山衛百戶韓永受請復  
廣西地方水陸通衢并土產貨物稅課及開採礦務有  
裨國用 上命御馬監右監丞沈永受督率原奏官民

前去彼處會同撫按官照例徵收開採銀兩解進不許  
擾害地方 薊遼總督邢玠奏內官高淮奏討原稱空  
閒衙門准改爲福德店今查係薊遼兩鎮總督軍門駐  
紮適中調度處關係邊防豈有改移之理奉 旨既有  
空閒察院公署一座准奏旣便查與高淮着爲前店  
應天衛百戶范蒼奏貴州稅課并土產名馬有裨國用  
上命內官監左監丞張慶督率原奏官民照例徵收  
內閣揭帖諫止 上諭覽卿奏忠 君愛 國遠慮深  
謀嘉尚不已且貴州稅課差官非專爲貨財欲訪彼中

軍民利病起釁之由耳既卿這等說朕亦思念正在用  
兵征討之時 勅諭留中未發已停寢矣况大臣義同  
休戚尤當仰體調停鎮靜何乃各衙門今又紛紛瀆擾  
其如 國體何前遣內官張慶已不着去了特 諭卿  
知 太監高宗進福建稅銀奉 旨這所奏歲徵稅銀  
五萬兩爾既會同撫按等議處完足照 勅旨按季解  
進這所議本省兵餉留用三項銀兩內樽節各項銀五  
千八百八十一兩并裁減各項銀六千九百二十四兩  
俱准留充邊餉之用其中折價銀二萬二千四十二兩

有零稍俟兵餉充足還着照舊應用 騰驤衛百戶仇

世亨奏湖廣通省各府州縣積貯各項存留羨餘等銀  
約有億萬餘兩及興國州民人徐鼎等朋掘古墓黃金  
巨萬 上命內官陳奉不妨原務帶管督率原奏官仇  
世亨原任守備官戴燁土民漆有光會同撫按官員查  
明銀兩一半留與本省兵餉賑濟支用其一半及金兩  
等件一併解進應用 濟陽衛千戶何其賢奏查無礙  
銀兩奉 旨近來御史蕭重望題請清查天下郡邑歲  
額餘銀解部益餉已奉 明旨下部至今未見題覆好

生狗私玩視奏內各省歲額餘銀及積無礙銀兩便着各處差去督理稅務內官孫隆等會同各該地方撫按官從公嚴加查勘具奏若有隱匿抗違支吾玩視指名叅來重罪不宥 十一月 諭戶部南京係 聖祖舊都成法設定在外縣則有額設門攤稅課征解府部交納在京城則有供辦 陵殿薦新等項之費豈堪復行編審鋪行及門面房號徵銀 朕已洞知乃有內外官員查議奏請之 旨今既經內外守備監府部院及科道等衙門會議查明准免編派徵收內蘆課銀兩照舊

屬於工曹專管清查供辦袍服器皿等項支費其沿江上下新漲洲田照承天徵收子粒事例就着守備太監邢隆劉朝用督管擇委南監廉慎內官一員前去會同撫按等官公同南部蘆政司官督令各該府州縣官備查遺漏隱占數目冊報仍親行徧歷丈勘明白照例起課銀兩每年解進應用不許擾害地方如有官吏及勢豪人等抗違欺匿情弊據實指名叅來治罪不饒 十二月大同巡撫房守士酌議歸併稅銀奉 旨大同乃九邊第一重鎮外隣強虜內護 陵京地方至寒至苦

續文獻通考  
卷之五  
一三  
朕豈不知這本內說山西太原等四府及雁門等三關  
稅課已盈五萬額數属于內臣孫朝其大同一府稅課  
四千八百兩及查理牧馬草場及無碍官銀俱属于張  
燁都着各遵 勅旨管理解進如有彼此偏聽爭競奏  
擾的一體治罪不饒 時大寧前衛千戶劉三槐奏恭  
獻已山瑞礦等事奉 旨這所奏獻礦山忠義可嘉准  
差內承運庫僉書右少監王相督率原奏官民前去彼  
處會同撫按照例開採銀兩解進不許擾害地方寫  
勅與他 府軍右衛前所正千戶陳保奏自去歲見

聖旨差內臣李敬前來廣東雷廉瓊三府所屬合浦等  
處採取然其間未盡事宜不敢隱默看得廣東一省十  
府之地產珍奇之物則有珍珠瑪瑙珊瑚琥珀玳瑁雄  
黃象牙倭段翠毛冰片硃砂等物雜貨之類則有沉香  
降速苜草蘇木胡椒白糖龍枝及諸品藥材等物古稱  
豐稔之鄉萬物叢集之處若令各商各行牙稅銀兩每  
年不下三萬餘金皆被本土勢豪霸侵肥已此臣之汲  
汲于心者一也臣查得 世宗初年廣東原設有總鎮  
兩廣地方 御馬監太監潘忠市舶司太監熊宣看珠



池廉州府楊梅青鶯平江三池太監牛榮臣見近奉  
欽依內臣李敬雖在彼處率衆採珠三府所屬動經千  
里之外使李敬一人兩目不能徧觀隻身不能兼歷第  
恐群小作弊以致精細者不能以進供 上用此臣之  
汲汲于心者二也臣訪得在內忠正之臣惟內官監太  
監李鳳歷事 三朝忠誠廉樸年逾五十動止周詳伏  
望我 皇上俯察臣言遵照 祖制舊例 勅命內官  
監太監李鳳充任總鎮兩廣兼管廣東等處抽稅并珠  
池等地方訪察軍民利病得失不時密封奏 聞如有

土產及方物珍重器寶不時差人進 獻及將先年彼  
處原設市舶司內臣衙門伏乞 欽賜店名不妨總鎮  
事務協同臣等前去徵收稅租銀四萬兩每年兩季解  
進 御前交收庶民無侵擾之私則大工得以克濟矣  
上卽俞允 燕山右衛千戶胡忠奏請復舊稅急救  
時艱以濟大工以裕邊儲奉 旨這所奏福建八府一  
州舊有市舶稅務以濟 國用准差 御馬監左監丞  
高宗督率原奏官民前去彼處會同撫按等官照例徵  
稅解進不許擾害地方竊 勅與他 忠義右衛千戶

張國臣奏因時效忠恭獻奇寶照例採取以裕國用奉旨這所奏雲南地方所產金銀礦洞極廣且有寶井奇品等物有裨國用准差尚膳監太監楊榮督率原奏官民前去彼處會同撫按等官照例開採解進不許擾害地方寫勅與他燕山前衛指揮馮剛奏謹獻奇異銀礦以助大工以補國用奉旨這所奏福建地方見有先年礦洞設兵防守開採便益就着市舶徵稅內官高宗帶管礦洞督率原奏官民前去彼處會同撫按等官照例開採解進太監李鳳奏土豪李芸

私抽耕牛稅銀又同主謀鄉宦原任通判吳應鴻舉人勞養魁鍾聲潮梁斗輝等結黨千餘樹旗作亂驅毆衙門平毀公廨劫搶錢糧上命錦衣衛差的當官校將李芸等拿解來京究問有名的仍行欽差內官李鳳會同撫按官嚴拿正法其餘脅從姑免追治以安地方雲南道御史葉永盛奏言邇者礦店煩興權議繼起中使狼戾棍黨橫行西北江浙之間不勝其擾惟是留都根本之區稍稍安枕臣竊以爲一方私慶不意無賴武弁鄭一麒馬承恩輩復有京口儀真獻店設權之

請嗣京口無遣而儀真等處之稅如故已經科臣連疏  
抗論未蒙 俞允臣方欲具疏復論忽接邸報見供用  
庫左副使暨祿條議復舊稅內開沿江各府州縣內外  
河道有裝販私鹽貨料等項並容其統屬覺察夫自古  
設權止于江湖要津並未連及各府州縣亦止商賈裝  
載並無土商土著名色原奏官馬承恩借一儀真而牽  
連沿江上下借一商稅而巧立土商土著名色其設法  
造謀蔓延四及已罪不容誅乃暨祿又從而推廣之承  
恩曰沿江上下而祿又益之曰各府州縣承恩曰要津

通衢而祿又益之曰內外河道夫江南諸府州縣雖溪  
山窮谷何處無河何處無水道雖窮鄉僻塢亦何處無  
土著何處無交易今不論內外盡歸統屬則舉留都之  
府縣舉各府縣之河埠細及米鹽鷄豕粗及柴炭蔬菜  
之類一買一賣無物不稅無處不稅無人不稅將縣無  
寧村村無寧家內外騷動貧富並擾流毒播虐寧有紀  
極此開闢以來所未有之暴也暨祿又曰名不正則事  
不當欲將韓文盛等給與官帶委官名色庶免勢豪復  
捏假官之玷頃者 畿輔之間假官私委已不勝擾然

曰假官人猶得持其短長彼猶隱然惴懼惟恐一朝敗露譬之魑魅魍魎晝伏夜出肆害尚小今既命官自居恣睢縱肆何所不至即使帶彼將顯然以噬人白晝掠貨通衢如狼如虎如盜如虜誰阻之者且中官藉此輩爲爪牙此輩又藉各土棍爲羽翼凡十室之村三家之市有土著即有土棍有土棍即有藉土商名色以吞噬鄉曲者是梟獍連袂而戎莽接踵也民尚得安枕而卧哉 聖旨謂不忍加派小民臣謂加派雖云害民然派有定額徵有定制不如制者上司猶得以三尺議其後此則橫心所逞更無限制橫口所噬更無忌憚告之府縣府縣不敢理告之撫按撫按不能問告之 陛下 陛下又以為阻撓而反罪之民怨結胃哭泣徧野如是而人心不離天下不亂者自古及今未之常聞此其事非加派而害更甚于加派 皇上不忍之彼而獨忍之此是知挺之殺人而不知刃之殺人也 皇上之意以為徵商稅乃所以蘇小民不知奏內土著土商正所謂小民小民與商其實無兩諱言于民駕言于土商此羣小之巧計奈之何其不察臣聞 天子

三尺議其後此則橫心所逞更無限制橫口所噬更無忌憚告之府縣府縣不敢理告之撫按撫按不能問告之 陛下 陛下又以為阻撓而反罪之民怨結胃哭泣徧野如是而人心不離天下不亂者自古及今未之常聞此其事非加派而害更甚于加派 皇上不忍之彼而獨忍之此是知挺之殺人而不知刃之殺人也 皇上之意以為徵商稅乃所以蘇小民不知奏內土著土商正所謂小民小民與商其實無兩諱言于民駕言于土商此羣小之巧計奈之何其不察臣聞 天子

以四海爲家所不足者非財此數者歛之百姓不啻股骨髓聚之內府不足當毫毛爲毫毛無益之積致百姓流離困苦之憂非 聖明所宜忍而况上取一下取二官取一羣奸又取二利則歸下怨則歸上名則 朝廷蒙其垢實則羣小享其益 陛下何苦身歛怨而予奸黨以劫奪之藉爲也伏念 皇上燭羣小之奸謀軫無窮之蔓禍輕目前之小利思將來之隱憂收回 成命亟停暨祿之遣仍將首事鄭一麒馬承恩韓文盛林廷桂等付之法曹斬首藁街以爲將來欺 君瀆奏之戒

工科左給事中張問達疏釐正三事 一曰別忠佞之言以絕禍源國家所資于言者爲其陳利病而議興革也顧忠言每扞于縉紳重義之輩佞言則發于武弁無賴嗜利之徒 皇上試檢年來奏章言礦稅者誰而止礦稅者誰乎始奏開河南礦洞者千戶仲春也而指揮千戶王允馮綱等卽相繼以各省之礦務奏而礦爲害始奏增通灣店者千戶趙承勛也而指揮千百戶馬尚仁鄭惟明等卽相繼以各省直之稅務奏而稅爲害始山澤已竭關市已空而指揮千百戶郝承爵劉鑑等猶

以各省直未盡之礦稅奏于是開採權稅之害如焚而  
沸愈虐矣營身家之囊橐重省直之困傷果于大工  
何與而公帑何裨乎媚上罔上誘君欺君武  
弁之心何其私而其言抑何佞也至于輔臣之疏部院  
之疏與夫臺省之疏侃侃然剖析礦稅二大害吐精白  
瀝肝胆何其忠也佞言易入而害實易明忠言難售而  
益終難却臣故曰別忠佞之言所以絕禍源也一曰  
嚴貪酷之罪以懲巨惡我朝令甲官員貪酷者俱爲  
民重則逮治擬配擬戍又重者置之大辟不少貸法何

嚴也乃今礦稅內監左右之奸如中書程守訓原奏官  
陳保韋夢麒及張羽科楊汝信林攀劉之良等嚇詐多  
贓以數十萬計而溪壑之慾難盈打造金銀器皿以數  
千計而雕鏤之玩日進郡邑百姓皇上之赤子也毆  
傷至五十餘命縣驛史丞皇上之職官也捶楚至一  
時就斃射人手膀汨人師徒撤人廬舍掘人墳塋貪酷  
至此極耶未極耶奸惡劉有源挾仇嚇騙唆斃儒紳業  
已奉旨逮問如律正法矣守訓等罪狀較有源不啻  
十倍參劾者不止一官一疏反從而宥之寬之法若此

正即未正即 皇上母令騷擾地方不忍加派苦累商  
民之 旨一切違背而雄行橫歛以致在在驚惶人人  
危殆激變以貽 君父之憂及今不正其刑而守訓等  
之剝削攘奪將日益甚故曰嚴貪酷之罪所以懲巨惡  
也 一曰明叅劾之權以正 國體夫 皇上所恃以  
約束臣民肅清中外者在紀綱故在內設都察院十三  
道與六科臺省之臣以主糾彈司封駁此 國體也自  
臺省而外別衙門即以公事論列猶爲越職况于中使  
宵人乎今礦稅內監叅論郡守有湖廣內監陳奉叅論

府佐之疏有雲南內監楊榮叅郡守之疏廣東內監李  
鳳叅鄉官舉人之疏貪心一拂飛語輒興浸浸而論及  
按臣矣又浸浸而論及撫臣矣今山西內相孫朝又論  
清介第一巡撫之魏允貞矣嗟嗟守若令奉 上命以  
愛養斯民也爲何等官巡按奉 上命總全省除暴虐  
以安百姓也又何等官而陳增孫朝等敢于哆口論列  
將曰各省直以官員無大小盡由我叅劾各省直之利  
權無遠近盡由我播弄自此而變亂鼓煽自此而威劫  
淫刑則復何顧忌而亦復何事不爲利器假之匪人太

阿因而倒置一假百縱長此安窮紀綱陵夷殆盡如是而猶可以言國體乎猶可不亟正乎臣以爲有司中不恤民隱失職者糾在撫按按臣中不爲地方失職者糾在臣等若陳增等之捏奏有司是公肆誅求也孫朝等之捏奏撫按是明擅威福以報夙恨也肆誅求非法擅威福以報夙恨尤非法皇上宜赫然下嚴旨切責之嗣有怙惡不悛挾私妄奏如陳增孫朝等必罪仍著爲令則威福操之皇上而羣小自凜然畏三尺矣臣故曰明叅刻之權所以正國體也此三事者關係

國家生民最重臣不敢以一身一官之故上負皇上下負民生故敢効其諤諤之忠伏乞勅下部院議覆施行二十八年正月錦衣衛百戶夏榮奏魚課久虧餘鹽可惜奉旨這奏直隸寶坻縣地方先年設立魚廠原係內官管理歲進銀兩以供祭祀享用着開礦內官王虎兼管督理其彼處鹽場念係畿輔地方豈可擾害困累羽林前衛千戶王承德奏遺稅奉旨這奏南直內遺廬州四府州縣稅銀每年可得銀四萬兩准着儀真督稅內官暨祿帶管督率原奏官王承德



爲首土民謝溥前去會同撫按等官徵收銀兩一併解  
進何用多人叅議以滋煩擾 杭州土民童學羅天德  
等奏稱先年行查天下僧道廢絕山田地產可變價助  
工見有浙江杭州府洞霄宮存產萬金俱被勢豪盡占  
舉一可知有 旨令撫按官查奏 錦衣衛百戶王體  
仁乞併船稅奉 旨湖廣如奏浙江諸處俱以重復報  
罷 南京守備邢隆奏管洲田 上可其奏 山西撫  
臣魏允貞奏增稅額奉 旨這本說山西五府地方原  
奏稅額銀五萬兩大同屬于張燁已徵稅銀四千八百

兩今奏請行令太原等四府于四萬之外再加稅五千  
二百兩屬于孫朝共足原奏五府五萬額數既會議奏  
來特准如數徵收銀兩解進以濟國用以昭 朝廷愛  
惜邊疆商民德意 陳增奏南直隸雲臺山三官廟每  
歲香稅一千餘兩願比泰山事例委官查收以助國用  
上即命陳增收解 賜廟額爲護國三官廟 浙江  
稅務監丞劉成奏清查各省歲額餘銀及餘課無礙銀  
兩 上以南北二直隸係畿輔地方各有所司不必會  
查已有 旨了奏內蘇松常鎮原係南直隸所屬着孫

隆免行會查其浙省便行 欽差內官劉忠遵照前  
旨上緊會查具奏 丘秉雲進四川稅課銀七千七百  
餘兩奉 旨昨把總韓應龍所奏四川成都等府出產  
茶鹽稅課并重慶馬湖等府沿山千里盡產名木其大  
者進上小者變價歲利約可十萬餘兩如何朦朧重覆  
具奏顯是欲得委用圖利肥己擾害地方其茶鹽稅課  
照前 旨徵收解進該省所產名木就着內官丘秉雲  
會同撫按等官查勘具奏照例採取以濟大工奏內清  
查本省積餘無碍銀兩遵 旨上緊會查解進應用韓

應龍姑不究

孫隆奏王鎮等懷奸撥置越界橫征

上曰前有旨直隸沿江一帶往來船隻遺稅准着儀真  
督稅內官暨祿會同徵收不許侵越鈔關并各處疆界  
重徵疊收今如何聽信原奏官百戶王鎮土民錢文明  
等撥置又于無錫孟河京口等處統率群奸隨從數百  
餘衆徧插黃旗指稱 欽差員役攔截商船一暨重徵  
以致商船遠遁虧損稅課好生違背欺玩暨祿姑免究  
着策勵供職王鎮及錢文明還着暨祿會撫按官嚴提  
問擬不許連累無辜以安地方 吏部諸衙門尚書等

官李戴等奏九月中太白太陰同見于上又聞狄道山崩成坑更于平地湧出山大小五座太白太陰同時晝見相犯已爲極異乃至山陷成谷地湧成山則自開闢以來惟垂拱中有之而今再見矣夫天命主于民心民安則天示禎祥民不安則天垂譴告欲承天意當順人情近來天下賦稅之額比二十年以前十增其四天下殷實之戶比二十年以前十減其五東征西討蕭然苦兵自礦使出而百姓之苦更甚于兵自稅使出而百姓之苦更甚于礦加以水旱蝗災流離載道畿輔近地

夥盜公行至殺職官家屬二十餘人而地方官不敢以盜聞臣等以爲此非細故也 皇上憫念小民不忍加派德意甚盛臣等豈不仰體但奉差諸使各圖其私跟隨奸徒動以千百 皇上欲通商而彼專欲害民 皇上戒以勿信撥置而撥置愈多 皇上責以不許騷擾而騷擾愈甚 皇上之心但欲裕國不欲病民羣小之心必自瘠民方能肥己蓋近日有神奸二種其一專務窺探 上意具有成奏假武弁之手以上之其一專務剝害小民畫有成謀假中官之手以行之運謀如鬼域

取財盡錙銖遠近同嗟貧富交困貧者家無宿儲止憑  
營運但奪其數錢之利已扼其一日之喉至于富民更  
被傾害誣以漏報 國稅誣以盜賣礦砂誣以私販官  
鹽誣以偷藏禁木粧成局面聲勢赫然及其得財寂然  
無事需求不遂立見傾家無地可容有天難訴利歸羣  
小怨歸 朝廷假令民間不窮而怨民力猶堪而怨或  
爲民心猶固今以刺骨之窮抱傷心之怨一呼易動一  
動難安今日猶是承平民心洶洶不定一有風塵之儆  
誰爲可保者夫嗜賊誅闖白死此皆用人丁以爲兵用

民財以爲餉若一處小民倡亂各處小民應之何取兵  
乎何取餉乎 皇上神聖洞知今古自秦漢以來天下  
危亂之由惟有四字曰人人嗟怨而已臣不敢言其遠  
皇上試差親信忠實之人訪問都城內外里巷歌謠  
令一一其實陳奏則民之怨否居然可覩天心仁愛明  
示咎徵欲 皇上翻然改悟坐弭禍亂乃禮部各省之  
章未蒙批發而奸民搜括之奏又見允行即如何其賢  
遍解天下無礙官銀一節各處錢糧皆有定額所謂無  
碍云者不過支剩羨餘近日征調太頻徵求太急正項

錢糧尚多拖欠羨餘支剩何處得之此令一下急如星火不但指有碍爲無碍亦將指無銀爲有銀必將正項公銀半充進獻公用無措又派民間庫藏既空閭閻亦敝有司一有爭執輒爲阻撓身且不保何有于官官且不安何有于民又如仇世亨奏徐鼎掘墳一節事之有無誠難懸斷然以理論之豈有一墓而有黃金巨萬之理即使有之亦當先下撫按勘核虛實分別首從先正其掘墓之罪而后以墓中之物入官未有罪狀未明而先没入貲財者也片紙朝入嚴旨夕傳即有深冤誰

敢辯理不但彼此諸族又將攀害多人但有連株立見夷滅輦轂之下尚須三覆萬里之外止據單詞遂令狡猾至賤之流操此生殺極重之柄此風一倡誰不效尤臣等方欲陳奏而高時夏戴君恩之奏又得旨五日之內搜取天下公私銀兩已二百萬傾府庫之藏豈無盡日窮天地之產寧有已時奸內生奸例外創例臣等前日猶望其日減今日乃更患其日增不至民窮財盡釀成大亂必不肯止伏望皇上穆然深思超然遠覽上天可畏下民可憐亟與廷臣共圖修省杜中臣

攘奪之路絕羣小窺伺之萌無令四海蒼生之衆結怨  
清朝無令千秋青史之編貽累 聖德臣等有心恤緯  
無力回天所望者 九廟之神靈所恃者 九重之英  
斷耳不勝懇切仰祈之至 二十九年四月南京四川  
等道御史陳燧疏近聞邸報覩 嚴旨處分楚事道府  
諸臣降者降逮者逮一切爲陳奉所橫詆而羅織者無  
不落陷阱罹毒鋒矣迄今忽聞楚中稅監三月初六日  
殺死縣民李廷玉尹子芳郭維翰徐牛兒四人有被拿  
入稅府存亾未審者有王長兒謝夙二名俱被傷重垂

死者嗟嗟清平世界有此景象傳流都下人心洶洶尚  
容緘默不爲 陛下陳之乎夫 陛下初念大工煩  
費帑藏空虛特差權稅諸務聊佐一時國用之急顧諸  
璫肆出未免與小民較錙銖之利已非人情之所樂輸  
所以慰諭安輯之者獨有惓惓不許擾民之 旨存在也  
自陳奉銜 命入楚苞苴納級流棍掘人墳毀人房淫  
人婦女掠人財物刈人若草菅操聚斂培尅之術而侵  
撫按糾劾之權日弄機鋒節肆簧鼓恨州縣則害州縣  
憎府佐則害府佐惡青衿則禍青衿今日諧守道明日

傾監司暴戾恣睢日甚一日彼其心蓋視生殺予奪若掌中物而逮繫斥逐之令且朝奏而夕下陛下果以奉之採權爲無騷擾之甚而姑縱之以重其事權乎傳云有人斯有土有土斯有財今者人與奉爲仇家與奉爲敵不可謂有人矣羣情鼎沸大勢土崩殆哉岌岌而尤冀其能爲陛下歛財臣等所未解也夫楚人深于怨從古記之慄勇輕悍又其俗然也獨奈何令惡璫如奉者以楚人戕楚人而激變之故一鼓噪于荊州再鼓噪于承天今又疊見于江夏矣猶幸不大致決裂者以

二三憂國奉公之臣素爲調護也頃見逮繫相仍摧殘已極靡不垂首喪氣人人解體即忠良莫知措手爲社稷計將來誰復爲陛下腹心者孟氏不云乎君之視臣如手足則臣視君如腹心如陛下責臣工以腹心之報謂手足相視不當如今日犬馬之土芥之也一旦緩急孰與排難陛下即不爲諸臣計獨不自爲社稷計乎臣聞奉之處楚僭稱楚王輒呼千歲每出入陳兵自衛結納亡命數千人仍欲請十二中使碁布要地以惟所欲爲故先威揚道府州縣并鉗制撫按俾

一切莫敢誰何識者已虞其有逆瑾之禍即不然虐焰已熾怨讟日盈三湘七澤之間攘臂一呼聲應四起無論奉之終爲楚禍究其勢必至于不可收拾武昌去建業盈盈一水順流而下信宿可至舊京重地能保安堵無恙乎又臣等所大懼也矧荆楚乃聖祖發祥之地何容惡璫釀爲禍本切念皇祖鑒察必然震怒揆之聖衷亦自有大不忍焉者陛下朗然洞察穆然深思亟將陳奉逮去法司明正其罪工以慰聖祖在天之靈下以洩全楚士民之憤其先後被逮拘囚各官悉

從矜宥仍勅楚中撫按而下大小臣工爲國爲民不隨不激各畢其應盡之職分而戢其未定之人心庶幾一方安而天下安宗社靈長之慶端有攸賴五  
月都察院左都御史溫純疏臣等目覩今天下第一殃民起叛貽君父不美之名者無如礦稅諸使今天下第一安民弭叛昭君父至美之名者無如罷礦稅諸使蓋諸使之害一而叅隨之害百叅隨之害百而叅隨所引用土棍之害不啻千萬叅隨以諸使爲城社土棍又以叅隨爲城社城社徧天下而狐鼠亦徧天下狐鼠



編天下而天下可保無事乎當楚變未成之先人已慮  
有今日而不敢盡言使閭閻冤苦決裂以至此極致撫  
臣身不能自保中使所仇者撫臣楚民所怨者亦撫臣  
皇上所歸咎者亦撫臣然則撫臣將安策耶向使陳  
奉早聽撫臣與馮應京等言預爲收歛禍豈至此而不  
幸使撫臣馮應京等言驗而無益也雖然猶可爲也方  
今各省礦稅縱使殃民不獨一陳奉天下欲甘心礦稅  
之使者不獨一楚人楚未旱荒猶不堪此欲割刃于陳  
奉今自黃河以北東極遼左西盡宣大方數千里麥苗

已枯秋禾無望民之食樹皮者已無皮可食賣子女者  
已無人能買甚至有人相食之慘尚可謂楚雖變無傷  
天下雖有類楚者無能爲民雖飢餓不足卹耶故臣等  
切願 皇上遣官校速逮陳奉免爲亂民糞粉以全國  
體庶明威出自 皇上而太阿不致倒持且今何時也  
經年不雨 聖心已徹惕矣徹惕之言恐但激于一旦  
徹惕之實恐旋涉于空文故臣等切願 皇上應天以  
實撫衆以仁盡撤各省礦稅諸使兼釋馮應京蔡如川  
吳應鴻華鈺何棟如甘學書王正志杜承芳等與海內

更始普天率土又誰不頌我 聖天子英斷向者 明  
旨所謂權宜之計今果旋行而旋輟之也又誰不服我  
聖天子之大信蓋一舉而中興之業成一日而太平  
之治就不然人人切齒于諸使則人人思亂在在不堪  
其困擾則在在效尤誠恐盡如楚而日且加甚以其加  
于提校者加于諸使縱惡長奸辱國損威且滋甚而乘  
時鼓衆斬木揭竿之風有不忍言而不易勘定毋謂臣  
等今日坐視不言也然其機惟在乎 皇上一轉移之  
而已 皇下慨然下盈尺之詔俯俞臣等所請則既渙

之人心復萃將離之天意可回眼前之亂孽即消萬禩  
之鴻圖永固矣 江西巡按方大美一本鎮民鼓譟有  
因捕官救援無及據實直陳懇乞 聖鑒以周遠慮以  
安重地事江西礦地旋封于此旋開于彼人心不無恫  
疑臣不得已再四調停即有一二山場久採無益臣伏  
覆行各道禁諭居民幸不至于大譁臣一念愚忠以為  
上可供 內府之用下可全西江之命願與中使潘相  
矢心奉公而無樂乎其生擾也不意七月二十五日監  
舍王四監立棋杆于景德鎮藻麗炫觀誼傳爭看乃王

四先令巡檢方河枷一人後令百戶劉光宸責一人隨  
欲蔓擄平民再枷再責致激眾怒而碎杆毀屋臣于本  
月二十五日巡歷瑞州得知即星馳至省與撫臣會牌  
行查業已具疏上聞矣忽于十二月十七日接得邸報  
該江西礦稅燒造少監潘相題爲屬官藐法欺一君率  
眾燒毀 皇廠并毀 御器懇乞 聖明大奮 乾斷  
以壯 國威以正法紀事奉 旨這奏內土豪楊信三  
構黨萬餘燒燬新建廠房并毀瓷器等項代署縣印通  
判陳奇可既係委官不行救捕好生欺玩陳奇可及楊

信三都着錦衣衛便差的當官校拏解來京究問其被  
毀廠房准動支布政司錢糧委官量行修葺臣一見之  
不勝駭異夫王四假中使之威方河劉光宸又假王四  
之威一舍兩官鴟張虎踞叱咤若狂當五月 欽恤之  
時 恩例免枷之日百姓何能堪此羣千百人起而闕  
之思以逞于一擊因其脫逃無可甘心遂燒毀其屋而  
燎及廠房門廊此誰召之而誰集之哉緣其聞所聞而  
來觀者本爲逐聲見所見而狂肆者遂至吠影倉皇擾  
攘之中無所施其舉手投足之力即王四劉光宸且至

續文獻通考  
卷之三十一  
三十一  
黑夜奔竄巡檢方河惟有踰牆避匿耳通判陳奇可職  
司府捕兼管窰廠使其袖手不救已爲喪心倘至主謀  
放火罪何可宥然而奇可未始不纓冠以救也救且至  
于被嫚罵中飛石而幾被重傷也祇以迂執之性自負  
氣高出入之間動至跡忤中使以爲屬官而以文法繩  
之奇可以爲府官而以禮貌抗之先是沈榜搖尾入幕  
比日奇可強項分庭臣知中使久不能堪不虞今日之  
事遂藉此以中傷矣若謂變起于奇可謀倡于奇可該  
鎮耳目昭昭具在即中使此心且有不能昧者臣按一

方屬官果有不法而臣爲之救解臣不敢也起釁原有  
別因而臣不爲之明言臣亦不敢也謹據實咨諏直陳  
顛末至其法之當加與夫情之可原 皇上自有 聖  
斷臣何敢必焉臣所慮者江西土瘠薄而風織嗇民輕  
去其鄉動相鬪格十三郡惟饒爲甚饒惟景鎮爲甚商  
工輻輳亡命作奸有利則挾傭以爭有害則奮臂以起  
擒之則鳥獸逃而不可窮治激之則蜂蟻聚而立致戈  
矛民情之可慮也如此瓷器燒造原無額派錢糧率由  
布政司設處并借工部事例四司料銀湊支乃今價值

日增每次估計數漸至于盈倍蒐求既窮每次給發勢甚艱于躊躇欲執前以規後恐苦窳或藉以爲詞欲那彼以就此則空虛終無以爲應帑藏之可慮也如此江省水陸至京必泛彭蠡涉長江漕漕千里出入波濤非浙省僅渡京口徑達閩官者非糧艘聯幫而進尚有漂流窺船破浪而前寧無驚損待其驚損而責之補償既不能如糧船之攤賠賠補不前而責之重造又不免工本之再費船運之可慮也如此夫慄悍之民風既難就約束之內有限之錢糧不能當無已之求而造船之議

一行督責之威更熾中使未必甘爲荼毒而撥置則在叅隨叅隨既已橫肆恣睢而播弄又在羣棍有司惴惴不敢問譬潰癰一決將來不可收拾恐未必如今日隨聚隨散而撲滅若是之易也臣環歷江西遍觀十三郡之風度南懸崖密菁峒賊據險阻以憑依蠡海巨浸狂瀾湖寇恃帆檣爲出沒兩地上下自昔患之然而兵戎星羅碁列譏察日謹月嚴控御自我令行禁止猶可杜意外之虞而絕潢池之警獨景鎮爲四方叢集之區益之以監舍生擾信州爲三省交界之地加以採木安

續文獻通考  
卷之三百一  
傳今據廣信府申呈上永等縣流布妖言人心惶惑臣  
謂寧信其有毋信其無已行各衙門加意防禦恐其不  
測之患視景鎮爲尤甚爲此兩地者實爲江西之隱憂  
發於今日則變速而小發于異日則變遲而大至于大  
變而其戡定之術更有難乎爲力者伏乞 皇上申飭  
中使禁戢叅隨恪遵法令勿肆咆哮俾正供得爲轉輸  
閭閻可免騷動固西江之幸臣等之幸亦未必不爲中  
使之幸矣再乞 勅下工部覈價酌量虛實船運計議  
安危採木查勘利害可省則省可罷則罷此今日弭變

之急務而江西千百年無疆之福 七月湖廣守備兼  
管礦稅太監杜茂奏臣守備承天等處地方侍奉 陵  
寢徵收莊湖子粒等項復于萬歷二十九年五月內  
勅臣不妨原務兼提督廣寧店租礦稅鑄錢等項但臣  
所理者陳奉已敗之緒而臣所憂者瘡痍未起之民若  
應處徵解事宜不早爲奏請明白不免蹈前人之故轍  
何以裕 國利民而稱委任之重哉自陳奉不能體  
德意額外苛求以致商賈罷市行旅罷途人人自危在  
在思亂即承天爲 皇祖安靈之地法紀森嚴亦敢揭

竿鼓譟而不畏臣之隱憂久矣今特遣兵部大臣前來撫綏地方初定舟楫稍通人心始獲更生之幸而撫字徵求勢難一時併舉此臣之所深慮者除一切應納銀兩臣與撫官會議明妥設法徵採每年兩次解進以助大工之用其武漢等一十三府二州原議包稅銀六萬兩臣尚未知徵輸難易何如不敢擅議但查荊州襄陽二府原不在額解之內俱係陳奉自行抽取以爲買辦孝順貨物之用臣切思富有四海玉食萬方何者非其所有令臣下借買辦孝順之故自取兩府稅銀收養亾

命之徒重徵疊取百計苛求且又填給勘合濫差匪人無分省直到處尋買而差人于中取利用一開十用十開百勢所必有又于所到處狐假虎威凌虐商人打詐良善魚肉之苦不可勝言地方安能保其無事也況其買辦之費不係出自捐貲乃令內帑減應得之稅臣下增孝順之名羣小享侵漁之利地方受騷擾之害揆之事體孰得孰失此輿情之所甚不服也臣若不改弦易轍革故鼎新是雖非陳奉其人而尤陳奉其事豈不負更易之聖心乎臣于武漢等府應徵額稅銀兩外仍

將荆襄二府屬與撫按解銀除臣置辦鞘扛及一應公費外將所解銀兩加添類進不必差遣一人收買一物花費錢糧使怨歸于上利歸于衆務令衙門肅清投充屏絕則地方無打詐之害商民應惟正之供自然勸輸之恐後矣又何有揭竿鼓譟之變哉乞念三楚凋殘之衆查微臣赤報無私 乾剛獨斷俯准所請庶 國課無虧下民益利而白叟黃童頌祝 聖壽無疆其餘未盡事宜容臣會同撫按議處妥當再行奏請定奪施行三十年二月儀真稅務太監暨祿奏稱原奏廬鳳淮

陽四府遺稅及沿江一帶船料共課一十二萬皆出揣摩之數今地方旱澇閭閻蕭條商民盡苦乞以見徵定額責成有司徵收類解奉 旨遺稅准照一萬二千兩有司徵送暨祿收候船料照見進一萬一千五百兩同原奏委官徵收數進 本年二月十六日有 旨開礦抽稅爲因 三殿兩宮未完帑藏空虛權宜採用今着傳 諭各處礦稅織造燒造俱着停止其南京供應機房係舊制并蘇杭織造內官有 御用及婚禮袍服俱着照舊已採徵在官金銀等件并織完絨疋燒完磁器



還著原差內官押解進用如有奸惡截阻及驛遞應付  
遲慢者指名叅處鎮撫司及刑部干連前項人犯都著  
釋放官各還職建言諸臣都著復職行取科道俱着補  
用兵部尚書田樂戶部尚書陳渠俱着即出供職工部  
尚書楊一魁失塞黃洞口衝我 祖陵着革職爲民次  
日司禮監太監田義又傳奉 聖旨開礦抽稅爲因  
三殿 兩宮未建帑藏空虛權宜採用其各處礦稅織  
造燒造等項俱照舊行俟 三殿落成爾等行戶部請  
旨停止恐爾等不知 旨意到即與各撫按等知聞

如有妄造謠言爾即時指名叅奏重治不宥鎮撫司刑  
部人犯俱牢固監候 是年三月刑科給事中楊應文  
奏臣辦事該科見陝西稅監梁永本再四者詳竊痛徐  
斗牛不得其死如此而猶未悉其詳也又謂杭大賢暴  
橫無忌如此而猶未知其爲誰所使也及接陝西巡撫  
賈待問揭帖具言渭南知縣徐斗牛奉公體 國稅銀  
完解陝被積棍大賢謀充稅委仗梁永之勢假權稅之  
名帶令叅隨李良金張月杭白子等數十餘人抗違不  
許擾民 明旨冒稱 欽差大張旗幟勢焰喧赫闖入

渭南縣堂餽以下程未厭也復索常例逼罵斗牛未已也復鎖打胥吏收頭等而王興國趙應貴娼婦石小成三命一時斃于箠楚之下彼斗牛始受其凌虐公堂而不甘既被其殺死子民而不忍當日氣絕殞命通縣縉紳生儒百姓不勝悲忿具呈正法則斗牛之死實由大賢之逼所以令大賢恣暴厲殺縣官等四命則永使之也是大賢罪在不赦而永亦難免主使之條矣茲奉聖旨知道了奏內委官杭大賢致死知縣徐斗牛情由果否虛實使着內官梁永會同撫按等官從公究問明

白奏請定奪不許偏執徇私該部院知道則斗牛之冤皇上業已洞鑒臣等可容無言矣但詳永之疏不曰委官殺人有罪而曰委官含冤已極則大賢之惡固永所庇護永身犯主使之條則固與大賢同科並罪者也烏可使有罪之人而任會問之責乎况斗牛受皇上牧民之任職雖七品命實至重大賢一旦殺之則天下之爲令者胡能一日安于民上而爲皇上撫按元元乎斗牛經營稅銀俱已完解于法可幸無罪大賢又烏得奉永之命而遽殺之也至如王興國趙應貴等三人

雖微賤乎皆 皇上之赤子也螻螻三命祇供大賢之一怒而人如草菅彼大賢與永信不可一日容于 聖明之世矣伏望 皇上勅下彼處撫按將杭大賢等一千人犯嚴行提究如律治罪梁永免令會問撤回京師聽候 明旨處分則巨惡懲而 朝廷之法紀以振沈寃雪而人心之忿恨以消三秦重地若安瀾矣 是年二月江西巡撫夏良心奏本年正月准督理江西礦稅燒造右少監潘相手本開該錦衣衛百戶王心澤奏浙江衢州府接界江福永豐浦城官山內產大木乞要採

伐已經委官勘銅塘封禁山界連浙江福建江西三省中無大木續該騰驤衛百戶趙應璧為奏產有大小相應開採該臣會同巡按御史方大美看得江浙閩三省之交有山二處一名雲霧一名銅塘先年因寇賊據險叛亂克平之後俱嚴封禁夫應璧所奏者雲霧今欲開者銅塘 旨下所查者大木今所採者雜木數日之間差人絡繹民間騷動闔境驚惶府縣之申呈累牘士民之控告接踵咸謂銅塘一開禍機叵測與中使熟計而竟不入也在中使視彼為利藪在臣等慮此為難端但

本山崇岩邃谷外巉內夷素爲盜賊巢穴蓋自唐宋以來即爲封禁其故姑無暇論 明興以來宣德正統間爲叛寇項三鄧茂七葉宗留王龍鄭祥四蒼大頭等哨聚不獨殺官兵荼生靈不可數計而叅政張英戰歿知縣鄧顥遇害正統十四年特遣尚書金濂寧陽侯陳茂保定伯梁瑤平江伯陳豫相繼帥師征勦數年乃平轉餉征兵暴骸積骨難以縷述至嘉靖四十五年江西德興浙江開化礦賊作亂劫掠直隸徽寧等處突入婺源縣燒燬縣治大掠而還其勢益熾于是科道諸臣請設

總督及兵備等官將前山巖加禁封揭立豐碑以示永久又增立巡司多兵防禦此可按籍而考也迄今三省地方人民獲安詎非封禁之明驗哉今一旦開山伐木恐有四方如鄧葉輩觀釁乘隙竄聚揭竿江省自此無寧日矣職復考形家書南條幹龍之脉起自岷山其一支自南而來度庾嶺從節武抵信州千里來龍羣峰起復結局于建康鍾山風藏氣聚 太祖高皇帝園陵在焉又開形家言銅塘分水東流入浙西流入江中爲建康龍脉過接之處極宜蔭護不得損傷夫士庶之家一

竝一隴尚圖林木叢茂蔭護來龍 皇上爲 聖子神  
孫建一萬年不拔之基詎可不爲 祖陵計聽彼開山  
伐木俾龍脉單寒致有損傷乎

三十三年十二月初七日文書房劉用捧出 聖諭內  
閣朕以頻年 天象示警朕心兢惕殊切省躬昨覽工  
部再疏題請鼎建殿門以完鉅典但物力難支何時就  
緒連日熟思見今河工城工一時並舉工程浩大錢糧  
數多內外帑藏俱匱民窮財盡之時朕甚惻然已遣內  
官監經管内官查理通灣見貯木植回奏且大工浩費

不貲其開礦抽稅原爲濟助大工不忍加派小民採征  
天地自然之利今開礦年久各差內外官俱奏出砂微  
細朕念得不償費都着停免若有見在礦銀就着礦差  
內外官一員一併解進馳驛回京原衙門應役凡有礦  
洞悉令各該地方官封閉培築不許私自擅開務完地  
脉靈氣其各省直稅課俱着本處有司照舊徵解稅監  
一半解進內庫以濟進賜供應之用一半解送該部以  
助各項工費之資明顯朕仰體上天仁愛祖宗監臨敬  
畏修省實政昭示朝廷權宜濟助大工愛民固本德意

待大工稍有次第奏請通行俾免鄉等擬諭來行

此諭一出而商頌于市旅頌於途民頌於野數年積  
蠹一掃而更新之漢武輪臺之悔何少讓焉

續文獻通考卷之三十一終

